



► **M. Mars Di Bartolomeo**, *Président*.- Merci. Ech ginn dovun aus, dass mer se an d'Conférence des Présidents ginn. Do kënnen mer dann iwwert dee weidere Wee diskutéieren.

Sidd Der domat d'accord?

► **M. Gast Gibéryen** (*ADR*).- Jo.

► **M. Mars Di Bartolomeo**, *Président*.- Merci. Dann ass dat esou decidéiert.

Mir géifen zum nächste Punkt vun eisem Ordre du jour iwwergoen: de Projet de loi 7047. De Projet de loi handelt iwwer eist Waasser. D'Riedezäit ass nom Modell 1 festgeluecht. An de Rapporteur vum Projet ass och scho prett. Här Anzia, Dir hutt d'Wuert.

4. 7047 - Projet de loi modifiant la loi modifiée du 19 décembre 2008 relative à l'eau

Rapport de la Commission de l'Environnement

► **M. Gérard Anzia** (*déi gréng*), *rapporteur*.- Merci, Här President. Haut hu mir jo grad déi richteg Meteo dobaussen, fir zu dësem Thema, d'Waassergesetz, ze schwätzen. No laange Woche vun Dréchent ass et och deem Leschten, mengen ech, zu Lëtzebuerg kloer ginn, dass d'Waasser ganz kloer d'Grondlag fir d'Liewen hei op der Äerd ass, dass d'Waasser eist wichtegst Liewensmëttel ass an dass d'Waasser muss geschützt ginn.

De Projet de loi 7047, genannt Waassergesetz, deen d'Waassergesetz ofännert vun 2008, huet 38 Artikelen. Et ass e ganz technesch Gesetz, wat ech awer probéieren, esou einfach wéi nëmme méiglech hei als Rapporteur duerzestellen.

Et geet ëm dräi Voleten, eng Kéier ëm d'Drénkwaasserschutz, a virun allem d'Drénkwaasserschutzzonen an d'Ausweisung vun deenen, dären 80 Stéck am Ganze wäerte fir Lëtzebuerg ausgeweise ginn. Et geet awer och ganz kloer ëm Ofwaasser, ëm Reewaasser, ëm Kläranlagen, vun deene mer nach eng iwwer honnert mechanesch hei zu Lëtzebuerg hunn, an déi sollen u sech ersat ginn duerch nei, an déi 90 biologesch Kläranlagen.

Et geet an engem drëtten Volet awer och ëm Héichwaasserschutz, ëm Renaturéierung. Ech mengen, de Klimawandel d'lescht Joer, dat war am Juli 2016, Dir hutt alleguerten nach déi Biller virun Aen, déi Biller aus der Fiels a vun Noumer an aus där Géigend do, wou mer u sech gemierkt hunn, dass mer deene Staarkreephecomeener, déi méi dacks wäerte kommen, e bëssen hëlleflos ausgesat sinn. An duerfir mussen mer verstärkert op Renaturéierung setzen an op Héichwaasserschutz. Mir müssen also Retentionsfläche schaffen. An dat kënn och der Biodiversitéit zegutt.

Ech ginn elo méi op dat Parlamentarescht an oder déi Aarbecht, déi mer gemaach hunn an der Chamberskommissioun. Den Depot vun dësem Gesetz ass den 31. August d'lescht Joer gemaach ginn. De Conseil d'État huet säin Avis dozou ofginn de 7. Februar 2017. D'Chambre des Métiers huet hiren ofginn den 21. Oktober, d'Chambre de Commerce de 17. Januar 2017, d'Chambre d'Agriculture den 23. Februar dëst Joer. Weider Avis sinn erakomm, an zwar vum OAI den 9. Dezember 2016, der ALUSEAU den 12. Dezember 2016, dem Syvicol den 19. Dezember 2016, an dann hu mer de SIDEN an de SIDERO jee weils mat engem Avis de 16. Januar an de 6. Februar vun dësem Joer.

Mir haten insgesamt aacht Reunionen an der Umweltkommissioun, fir iwwert dëse Projet de loi ze schwätzen. An de 15. September sinn ech selwer do zum Rapporteur vun dësem Gesetzestext ernannt ginn. Déi aner Reunionen waren net 2016, mä 2017 nom Avis vum Statsrot, den 1. Mäerz, 8. Mäerz, 15. Mäerz, 29. Mäerz a 5. Abrëll, wou mer déi Artikel vum Projet de loi analyséiert hunn an och den Avis vum Statsrot. An do sinn eng Serie Amendementer adoptéiert ginn, an dat war de 6. Abrëll 2017. Den Avis complémentaire vum Statsrot hate mer den 23. Mee 2017 virleien. An och deen Avis ass ënnersicht ginn, an zwar den 31. Mee. A schlussendlech hu mer an enger leschter Reunion, de 14. Juni, dëse Rapport hei ugeholl.

Ëm wat geet et an dësem Projet de loi?

Ech hat et am Ufank scho gesot. Et geet drëm, ënner anerem, fir d'Prozedur fir d'Definitioun vun de Zones de protection des ressources d'eau, also d'Drénkwaasserschutzgebidd, fir déi Prozedur ze adaptéieren, ze clarifiéieren. Et geet drëm, verschidden Obligatiounen, déi am Gesetzestext stoungen, déi sech als superfétatoire erausgeschéit hunn, fir déi u sech och ofzeschaffen. Ënner anerem sief do genannt de Cycle urbain de l'eau, de Plan national vum Cycle urbain de l'eau, deen ze erstellen war.

Dann ass et esou, dass eng Reorientatioun vun de staatleche Subsidien aus dem Waasserréseau an dëse Projet de loi agefloss ass. Zu deem kommen ech méi zum Schluss. A mir hunn och verschiddene Bemerkungen vun der Europäescher Kommissioun Rechnung gedroen, wat d'Ëmsetzung ugaangen ass vun den Direktiven 2060 respektiv 2067 ebe betreffend d'Gestioun vun de Risikoe vun Héichwaasser.

Et geet an dësem Projet de loi dorëm, méi Akteure mat ze bedeelegen un deene verschiddene Prozesser, wat d'Waasser ugeet. Do denken ech un d'Waasserramenrichtlinn, un den Héichwaassermanagementplang, awer och un d'Drénkwaasserschutzgebidd.

An déi Ureegungen, déi komm sinn, souwuel vum Conseil d'État a sengem Avis respektiv vun de Chambres professionnelles an aneren Intervenanten, sinn agefloss eben an eng Serie Amendementer. An déi sinn dann en gros folgend: Et kënn niewent deenen dräi besteeënde Secteuren e véierte Secteur Horeca bäi, an dat betreffend eben d'Tarifikatioun vum Waasser.

Dann ass et esou, dass mer eng Reorientatioun fonnt hunn, fir d'Déclaration obligatoire par règlement grand-ducal souwuel vum dem Programme de mesures an äänleche Moossname festzuleeën. Dorop kommen ech méi spéit nach eng Kéier zrëck.

An dann: D'Kritäre fir d'Subsidien, déi bei deene Mesuren ze kréie sinn, déi sinn eben och nei fixéiert ginn.

A schlussendlech war et esou, dass an deem éischte Projet de loi virgesi war, no engem gewëssenen Délai, wa keen Avis vum Conseil d'État (veuillez lire: Conseil communal) virlooch, zum Beispill zu den Drénkwaasserschutzgebidd oder zur Waasserramenrichtlinn an esou weider, fir u sech e Passer outre ze maache vun deem Avis vum Conseil communal. An do ass dovun ofgesi ginn.

Ech ginn awer méi präzis op déi verschidden Avisen hei an.

Den Avis vum Statsrot: Bon, fir d'Éischt eng Kéier, den Avis vum Statsrot vum 7. Februar 2017 huet erëm eng Kéier opgeworf déi Iwwerleeunge sengersäits, fir d'Zones de protection, bei Drénkwaasserschutzgebidd, an zwar d'Zones de protection rapprochée, dat sinn d'Zonen 2, fir u sech erëm eng Kéier unzestoussen, ob een net soll iwwerleeën, fir déi d'utilité publique ze erklären.

Ech kann awer elo scho virausschécken, dass d'Kommissioun deem net nokomm ass, vu dass déi Envergure eben eng grouss ass. Dat muss ee wëssen, dass déi Drénkwaasserschutzgebidd der insgesamt zirka 10% vun der Landesfläche ausmaachen, dovun d'Halschent awer dann an de Bëscher leien, an dass awer e groussen Deel, à voir, wéi déi Projeten ausgesinn, an der Zon 2 leien, an duerfir hu mer dovun ofgesinn.

Duerno ass gesot ginn, dat war an deem éischte Projet de loi virgesinn, fir zousätzlech Secteure kënnen ze schaffen. De Statsrot sot: „Da musst Dir dat präziséieren, wat déi zousätzlech Secteure si bei der Tarification de l'eau!“ An dat ass och duerno gemaach gi mat deem virgenannte Secteur Horeca.

Dann d'Opposition formelle hat ech schonn ugedéit, fir u sech de Passer outre vum Avis vun enger Gemeng ze maachen, wann déi ëm en Avis gefrot gëtt, och wann deen hors Délai wier. An da waren d'Reserven och vum Statsrot do, fir déi Mesuren, déi Subventionéierung fir zum Beispill Renaturéierung, fir Héichwaasserschutzmoossnamen auszeweite vun de Gemengen eben op d'Akteure vun de Personnes physiques et morales. An och do hu mer an dem Amendement eng Léisung fonnt per Annex, fir dat ze präziséieren an do dem Avis vum Statsrot Rechnung ze droen.

Ech kommen zu de Chambres professionnelles.

D'Chambre de Commerce begreist natierlech déi Vereinfachungen, déi ebe vun der administrativer Säit komm sinn an dësem Projet de loi, an ënnerstëtzt och u sech déi Reorientatioun vun de Subsidien aus dem Fonds pour la gestion de l'eau. Dann ass et natierlech esou, dass se awer nach eng Kéier monéiert, dass déi Progressioun, wat de Waasserpräis ugeet, dass si als Chambre professionnelle, also, wéi gesot, d'Chambre de Commerce awer gesäit, dass, vun der Direktiv 2000 ausgoend, eben de Waasserpräis an d'Luucht gaangen ass, wat jo och net anormal ass, vu dass d'Gesetz vun 2008 duerfir d'Basis geschaffen huet, fir dass d'Gemengen u sech eng Tarification Utilisateur respektiv Pollueur-payeur géifen ëmsetzen, wou och scho festgeluecht ginn ass, wéi déi Berechnung vun dem Waasserpräis muss sinn.

An dann natierlech hir Bedenken, déi se hunn, dass de Waasserpräis eventuell nach eng Kéier géif an d'Luucht goen an hir Entrepreneuren eben dovun en Nodeel hätten. Fir de Rescht weisen

ech dann nach eng Kéier op mäi schrëftleche Rapport hin.

Dann d'Chambre des Métiers nach eng Kéier ganz kuerz. Déi geet och erëm eng Kéier op déi Iwwerleeungen zur Majoratioun vum Waasserpräis an, huet och do Bedenken, dass dat Implikatiounen fir d'Entreprisë kéint hunn. An do kommen och weider Autorisatiounen, déi noutwendeg sinn, wann ee Konstruktiounen, Aménagementen huet, déi mam Grondwaasser a Kontakt kommen. An och do huet si staark Bedenken.

D'Chambre d'Agriculture konzentréiert sech erëm eng Kéier op d'Tarifikatioun respektiv eng Hausse, déi eventuell fir si kéint kommen, an eben och déi Nodeeler, déi si gesäit fir hire Secteur.

Voilà, dann hunn ech hei nach de Syvicol. De Syvicol huet virun allem ebe monéiert, dass e sech iwwerleert: Ass dat doten dee richtige Wee, fir hinzugeen an déi Modifikatioun vun de Subsidien - mir wäerten drop ze schwätze kommen, virun allem d'Erofsetze bei de Kläranlage vu 65% op 50% -, ob dat dee richtige Wee ass, fir dass d'Gemengen an d'Ëmsetzung kommen?, an huet hei och a sengem Avis geschriwwen, dass déi Delaien, déi ganz dacks derzou gefouert hunn, dass d'Projeten net ëmgesat gi sinn, net eleng bei de Gemenge géife leien.

Den OAI huet a sengem Avis nach eng Kéier opgeworf, dass si Problemer gesinn, dass hire Berufsstand ëmmer déi noutwendeg Capacitéit hätt am Engineering, fir déi Projeten, wat d'Kläranlagen ugeet, kënnen fristgerecht ëmsetzen. E weist dorop hin, dat ass säin Haaptmessage.

D'ALUSEAU huet sech mat deem technesch Volet auserngeesat, wat u sech elo d'Berechnung ugeet vum Waasserpräis, dat heescht d'Équivalent-habitant respektiv d'Équivalent-habitant moyen, wou dat eent eben e Wäert ass, deen ze dinn huet mat der technesch Ausleeung vun Ofwaasserstrukturen, mat der Dimensionéierung vun deenen Elementer, an dat anert huet einfach mat enger Tarifikatioun ze dinn.

An dann hätte mer nach de SIDEN, déi sech nach eng Kéier ralliiert hunn op deen doten Avis, deen ech elo grad genannt hunn, an eben dann och natierlech déi Diminutioun vu 65% op 50% am Beräich vun de Kläranlagen net positiv aviséiert hunn.

De SIDERO huet sech ralliiert un den Avis vun der ALUSEAU.

Ech géif also elo probéieren, ganz kuerz duerch d'Artikelen ze goen. Dir fannt all Detailer a mengem schrëftleche Rapport. Dee Rapport ass ganz voluminéis, well et eben ee ganz technesch Gesetz ass, an duerfir picken ech just nach eng Kéier zwou Saachen eraus.

D'Tarifikatioun hat ech schonn erwänt vun deene véier Secteuren. De Secteur, deen u sech d'Hotelieren, d'Cafetieren, d'Restauranten an och d'Campinge betrëfft, dee war elo ëmmer verstoppt an de Menagen. Dee kritt elo e Secteur à part.

Mir hunn de Volet vun de Programmes de mesures, dat ass souwuel am Artikel 10, 14, 23, de Plan de gestion des risques d'inondation, d'Héichwaasserkart, d'Héichwaasserrisikokarten an och d'Plans de gestion de district hydrographique, déi net méi per Règlement grand-ducal als obligatoresch deklaréiert ginn, mä vum Conseil de Gouvernement approuvéiert an am Journal offiziell publizéiert ginn.

Dann hu mer verschidde Moossnamen, déi ergraff kënnen ginn am Kader vun dësem Waassergesetz, déi d'Utilité publique unerkannt kréien. Dat ass souwuel d'Renaturéierung vun engem Waasserlaf, dat sinn awer och Mesuren am Beräich vun der Drénkwaasserversuergung wéi eben och am Beräich vun dem Ofwaassertraitement. Da sinn nach nei Sanction-pénallen agefouert ginn, an zwar Amendes administratives, fir méi einfach kënnen kleng Verstéiss ze aanden, ouni dass dat all Kéiers d'Gerichter belaauscht.

An da kommen ech zu dem Hauptdeel nach eng Kéier ganz kuerz, zu de Subsidien: Do ass eng Reorientéierung do, an zwar ass an deem Volet vum Gesetzestext de Wee opgemaach ginn, fir vill méi Akteure kënnen mat eranzehuelen, an zwar net nëmme d'Gemengen an d'Gemengesyndikater, mä och staatlech Verwaltungen, Établissement-publicken a Personnes privées a morales.

Am Grouse geet et drëm, dass eng Partie Moossnamen eropgesat ginn, an zwar alles, wat Drénkwaasserschutzzone ginn an déi Moossnamen, déi dermat ze dinn hunn, ginn erop op 75%. Wat den Héichwaasserschutz ugeet, dat geet och erop op 80% respektiv Etüde ginn zu 100% iwwerholl.

Erof ginn d'Subsidien, wat u sech d'Klärung vu Waasser ugeet, dat heescht, alles, wat Ofwaas-

ser ass respektiv Reewaasserféierung, vu 65% op 50%, awer et gëtt eng ganz Partie Iwwergangsbestëmmungen. An nei Subsidien, déi agefouert gi sinn, sinn zum Beispill d'landwirtschaftlech Berodung an d'Drénkwaasserschutzgebidd mat 75%, interkommunal Drénkwaasserleitung gi mat 50% subventionéiert, Rechercheaarbechten, grad fir erausze-fannen, wou d'Politiounen hierkommen a wat fir Moossname mer kënnen ergräifen, zu 100%. An och si sechs Projet-piloten am Drénkwaasserberäich, déi zu 100% ënnerstëtzt ginn, am Gesetzestext hei virgesinn. Et geet also net drëm, ze spueren. Et ass eng Reorientéierung a bis 2027 sinn 1,1 Milliarden Euro fir de Fong virgesinn.

Ech ginn elo weider net op d'Bedingungen an, fir d'Subsidien ze kréien, wat ee Volet ass, dee geännert huet, an och d'Dispositions transitoires; do wäert mäi Kolleg, de Koxen Henri, nach am Detail op all déi Mesuren do agoen. An ech géif dann hei zum Schluss komme vu mengem Rapport.

Ech mengen, mir sinn eis alleguerten hei an der Chamber eens, dass dat hei en Dossier ass, deen ëm eng liewenswichtig Ressource fir Lëtzebuerg geet an dass mer alleguerten eis Responsabilitéit müssen iwwerhuelen. An all Akteuren zu Lëtzebuerg mussen sech deem bewosst ginn: de Stat natierlech, d'Gemengen, d'Betriber an d'Bauern, awer och all Einzelnen, deen hei zu Lëtzebuerg schafft a wunnt. An dëst Gesetz setzt op de Schutz vum Waasser, op d'Präventioun an et ass gutt fir d'Umwelt. Et ass sécherlech och gutt fir d'Betriber a gutt fir de Bauer. Et ass gutt fir all déi, déi op déi Ressource Waasser ebe müssen zrëckgräifen, dass se propper ass, dass se geschützt gëtt. Et ass gutt fir all Mënsch, deen hei zu Lëtzebuerg wunnt. An et ass och essenziell fir déi Generatioun, déi no eis kënn, dass mer eist Waasser schützen.

Ech soen lech Merci fir d'Nolauschteren a ginn natierlech den Accord vun der grénger Fraktioun zu dësem Projet de loi.

(Brouhaha)

► **M. Mars Di Bartolomeo**, *Président*.- Ech sträichen direkt den Här Kox.

(Hilarité)

Merci dem Här Rapporteur an d'Wuert huet den éischte Spriecher, den Här Aly Kaes fir d'CSV.

Discussion générale

► **M. Aly Kaes** (CSV).- Här President, Dir Dammen an Dir Hären, bon, esou wéi et sech gehéiert wëll ech natierlech dem Rapporteur vun dësem Projet de loi, dem honorabelen Députéierte Gérard Anzia, villmools Merci soe fir säi schrëftlechen an och detailléierte mëndleche Rapport. Hien ass op déi wesentlech Punkten an Ännerungen vun dëser Reform vum Waassergesetz aus dem Joer 2008 agaangen, soudatt ech mech haaptsächlech op déi Punkte ka beschränken, déi mer als CSV an der Umweltkommissioun geännert wollten hunn, mä déi awer net an dësem Text berücksichtegt gi sinn.

Mir haten eng Rei ënnerschiddlech Amendementer a Propositionen zum Waassergesetz gemaach, déi awer alleguerte vun der Majoritéit an der Kommissioun ofgewise gi sinn.

Här President, Dir Dammen an Dir Hären, de virleiende Gesetzestext iwwert d'Reform vum Waassergesetz gesäit dräi Schwéierpunkte vir: Investitiounen a Präventioun ënnert der Form vun engem verbesserten Héichwaasserschutz a Waasserschutz, eng käschtenneutral Neioopdeeling a méi zilorientéiert Ausriichtung vun de staatlechen Hëlfele an eng méi grouss Abanung vun den Akteuren vum Terrain beim Waasserschutz.

Ee positive Punkt am Gesetz, dee mer och ganz sécherlech ënnerstëtzen, sinn déi nei, méi héich Bëihëlfe fir Héichwaasserschutzmoossnamen. Wann d'Gesetz emol bis a Kraaft ass, kënnen d'Gemenge mat enger staatlecher Ënnerstëtzung vu bis zu 90% rechnen. Bei Renaturéierungsmoossname gëtt de Gesamtmonstant iwwerholl. Dat ass ganz positiv, well d'Renaturéierung vun eise Baachen a Flëss u sech bekanntlech derzou féiert, dass se méi lues fléissen, dass d'Vitesse an domadder och d'Erosioun erausgeholl gëtt.

Den neie Subventiounssystem an dësem Beräich ass eng gutt Saach an dréit derzou bäi, den Ökosystem vun eise Gewässer ze verbessern. Ausserdem gëtt duerch dës Mesure och an d'Sécherheet vun eise Bierger investéiert. Mir begreifen awer ausdrécklech, dass d'Subventiounen mam neie Gesetz solle sub-



stanziall an d'Luucht gesat ginn, wënschen eis awer, datt an Zukunft d'Prozeduren dach awer wesentlech méi séier ginn.

Här President, Dir Dammen an Dir Hären, mat deem Gesetz soll och bei den Drénkwaasserschutz zonen nogebessert ginn: D'bürokratesch Hürde sollen da vereinfacht ginn, d'Waasserschutzmoosnamen an de Schutzzone kréien eng Bezouschossung vu 75% a bei neie regionalen Infrastrukture kënnen Gemenge mat enger staatlecher Finanzspréiz an der Héicht vun, wéi scho gesot, 50% vun de Gesamtkäschte rechnen.

Siwen nei Zone si laut der Madamm Minister aktuell a Planung. D'CSV deelt ganz kloer den ageschloene Wee vun der Regierung, fir nei Schutzzonen auszuweisen, well mer müssen d'Qualitéit vun eise bestoenden an och neie Quelle laangfristeg ofsécheren.

Den Accident an der Landwirtschaft an der Belsch mat Metazachlor huet eis kloer gewisen, datt et wichteg ass, eis Drénkwaasserreservoirën ze schützen. Duerfir begrësse mer och d'Bestriewunge vun der Regierung an deem Beräich. An där Problematik spillt awer och d'Landwirtschaft eng ganz wichteg Roll. D'Landwirtschaft ass e wichtige Partner am Waasserschutz a spillt eng zentral Roll, besonnesch wa mer wëllen an där Saach zu engem Resultat kommen. Duerfir ass et als positiv ze bewäerten, datt an Zukunft och d'Landwirtschaft vun enger Bezouschossung ka profitéieren, wa se a Waasserschutzmoosnamen investéiert.

Dir Dammen an Dir Hären, ech si mer och sécher, datt d'Landwirtschaft sech kenger Diskussioun, kenger Propos wäert verschlëssen, wann et drëm geet, eist Drénkwaasser ze schützen. Et muss duerfir sécher gestallt ginn, datt déi Leit, déi an iergendenger Aart a Weis an enger Schutzzon leien oder an Zukunft leie kommen an Aschränkungen hunn, och déi entsprechend ugepassten Entschiedegunge musse kréien.

Wann ech scho bei der Landwirtschaft sinn, wollt ech awer och e Wuert iwwert d'Notze vun Iwwerflächewaasser soen, virun allem an Zäiten - och wann et dann haut reent, esou wéi de Rapporteur dat elo gesot huet - vun enger extremer Dréchent, esou wéi mer se iwwert déi lescht Méint elo erlieft hunn.

Ben, et ass normal, datt een u sech eng Autorisatioun muss hu fir d'Notze vum Iwwerflächewaasser. An datt dat nëmme méiglech ass, wann och den Debit an eise Flëss an eise Baachen dat hiergëtt, och dat ass normal. An dach awer, wann et brenzlech gëtt, si mir ganz einfach der Meenung, datt, wann de Betriber hir Existenz dodrunner hänkt, da muss et méiglech sinn, méi onbürokratesch a schnell Geneemegungen ze kréien, fir ze verhënnern, datt d'Planze laang verdréchent sinn, ier ee schlussendlech eng Geneemegung huet. An duerfir plädéiere mir derfir, wéi gesot, datt et ganz onbürokratesch a schnell muss goen, fir esou Geneemegungen ze kréien.

Här President, Dir Dammen an Dir Hären, wann een Drénkwaasser seet, muss een natierlech och Ofwaasser soen, wat e groussen Afloss op d'Waasserqualitéit huet. Ech kommen domadder also, nodeem dat bis elo ganz positiv geklongen huet, zu de Kritikpunkten, déi mer um Gesetzestext hunn.

► **Une voix.** - A wou?

► **M. Aly Kaes** (CSV).- Den éischte Punkt betrëfft d'Definitioun vum Awunnergläichwäert am Artikel 2. Den Text, deem elo virläit, gesäit keng Präzisioun vum Awunnergläichwäert vir. Et kennt also weiderhin zu divergenten Interpretatiounen, haaptsächlech an der Industrie, am Horesca, am Horeca, wat dann elo déi relevant Charge vun engem Betrib ass. Zumindest hätt am Text misse präziséiert ginn, fir wat fir e Besoin d'Definitioun vum Awunnergläichwäert aus dem Gesetz duerf erugezu ginn a fir wat fir een net.

Et hätt an eisen Aen duerfir kloer missen definéiert ginn, datt den Awunnergläichwäert just fir d'Zoudeelung vun enger Aktivitéit zu hirem Secteur gëllt an net awer fir d'Tarifikatioun selwer. Dat ass, wéi gesot, net geschitt, mir bedauern dat, an duerfir wäert et an der Zukunft weider zu Mëssverständnissen a villen Diskussiounen kommen.

Den zweete Punkt, deem eis Problemer bereet, ass déi Nettarififikationsstruktur (veuillez lire: nei Tarififikationsstruktur), wéi se am Artikel 12 proposéiert gëtt. Duerch d'Gesetz gëtt een zousätzlech Secteur agefouert, fir deem ee separate Präis vum Waasser ka gefrot ginn. Et ass dat, wéi et scho virun ugedeit ginn ass, den

Horeca-Beräich respektiv den Horesca mat all deene Betriber, déi saisonal sinn.

Och wa mam Gesetz e véierte Secteur definéiert gëtt, esou gëtt et awer nach ëmmer keng Kloorheet, wéi den Tarif an deem Secteur soll gestallt ginn. Einfach e weidere Secteur definéiere geet net duer, well duerch de Berechnungsmodus vum Waasserpräis all Favereur an engem Secteur eng Defaveur an engem anere Secteur mat sech bréngt, dëst duerch de Prinzip vun de Vases communicants, deen aus der Direktiv ganz kloer interpretéiert gëtt.

Mir haten an der Kommissioun d'Proposition gemaach, datt dräi vun de véier Secteuren, dat heescht d'Agrikultur, d'Industrie an d'Horesca, jiddwereen eenzel sollt en eenheetleche Präis iwwert d'ganz Land hunn an et domadder och zu kenger Concurrence déloyale an dësen dräi Beräicher méi géif kommen. Dëse Prinzip hätt u sech Ongerechtegkeeten, déi duerch geografesch a sozial Komponente geschafe ginn, ofgeschwächt respektiv eliminéiert. Leider wollt dës Majoritéit net mat eis op dëse Wee goen. Hei gëtt par contre elo eppes geschafen, wat eiser Meenung no keen Inhalt huet a wat an der Praxis och näischt wäert bréngen.

Här President, den drëtten Punkt, dee mer net kënnen deelen, ass d'Erofsetze vun de staatlechen Hëllef fir d'Ofwaasser op nëmmen nach 50%.

Éischstens, de Ministère de l'Intérieur huet de Syndikater erlaabt, den Amortissement vun 100% op 50% ze reduzéieren, an dat ass richtig. De Service de contrôle des finances communales ass awer domadder net averstanen, mam Argument, datt déi aner 50%, déi jo deen Deel vun de staatleche Subventiounen ausmaachen, iwwert d'Budgetgesetz net amortisabel sinn, soudatt dem Innenminister seng Initiativ a Fro gestallt gëtt. Duerfir koom vun eis d'Initiativ, dëst am Waassergesetz ze regelen.

Zweetens, d'Madamm Minister argumentéiert, d'Gemenge géifen hir Infrastrukturen zu 50% iwwert de Waasserpräis respektiv iwwer Ofwaassertaxe finanzéieren, duerfir géif d'Uewergrenz fir Bähëllefen aus dem Waasserfonds op 50% begrenzt ginn. Doduerch soll verhënnert ginn, datt de Steierzueler zweemol fir déiselwecht Déngschtleeschung bezuele muss. D'Ausso, datt et jo nach 50% Subsid ginn a 50% duerch den Amortissement erakommen, ass einfach zu dësem Moment falsch. Dës Iwwerleung kann dann eréischt gezu ginn, wann den éischten Invest landeswäit gemaach ass an déi nei Bauwierker emol amortiséiert ginn. Dat dauert awer mindestens nach zéng Joer.

(**Interruption**)

Mir deelen dës Analysen a Meenungen net an hunn och duerfir e weideren Amendement an der Chamberskommissioun proposéiert: éischstens, den Taux vun de Bähëllefen erëm op den aktuellen Taux vu 65% vun de reale Käschen ze setzen; zweetens, datt och am Ofwaasserberäich d'Subside kënnen amortiséiert ginn.

Zu dësem Moment, Dir Dammen an Dir Hären, an dat muss ee ganz kloer wëssen, ass de Besoin u Gelder am Ofwaasserberäich esou grouss wéi nach ni. A grad an dësem Moment dréit d'Regierung de Geldkrunn zou an domadder och d'Méiglechkeet fir d'Gemengen a besonnesch fir d'Landgemengen, sech adequat fir d'Zukunft ze equipéieren.

De Problem läit awer net nëmmen am Invest, mä och am Entretien a virun allem am Amortissement. D'Festleeung vun der Regierung, fir quasi an all Uertschaft eng eenzel dezentral Anlag ze bauen, dréit Hiert natierlech derzou bäi. Wann een d'Berechnung vum realen Ofwaasserpräis mécht, dat heescht, ouni Deckelung, da kennt ee bei ville ländleche Gemengen, wann all Infrastrukturen da bis gebaut sinn, op e Präis vun iwwer 15 Euro pro m³. Mam Drénkwaasser zesumme bréngt dat eis iwwer 20 Euro pro m³. Dëst ass deelweis eng Verfënnaffachung zu deem, wat haut schonns gefrot gëtt. Dëst trifft natierlech d'Gemengen aus dem ländleche Raum ganz besonnesch a mat der territorialer Finanzreform vum Innenminister sinn dës Gemenge ganz kloer zweemol gebeidelt.

Bei de staatleche Bähëllefen am Beräich vum Ofwaasser gesäit de Projet de loi des Weidere Strofen a repressiv Mesurë vir am Fall, wou Gemenge respektiv Ofwaassersyndikater mat hiren Ofwaasserinfrastrukturen oder Kläranlagen net konform zu de Regele sinn.

Och domadder kënnen mer net d'accord sinn, well d'Retarden am Ofwaasser, wann iwwerhaapt, ganz sécher net eleng de Gemengen hir Schold sinn. Oft läit et un de staatleche Geneemegungsprozeduren, datt laang näischt respektiv net vill beim Ofwaasser geschitt ass.

Här President, e Wuert zu den Iwwergangsbestëmmungen bei den Autorisatiounen. Vill waas-

serrechtlech Geneemegungen uechtert d'Land fir bestoend Bauwierker si säit dem 22. Dezember 2012 ofgelaf. Mengen Informatiounen no ginn et nach ëmmer keng Autorisatiounen vun de bestoenden Ouvragen, déi duerch d'Waassergesetz hir al Autorisatioun jo verluer hunn. Mir haten u sech hei e Régime transitoire virgeschloen.

Dës Iddi ass awer verworf ginn, soudatt déi meescht Ofwaasseranlagen haut illegal bedriwwen ginn, wat am Prinzip nom neie Gesetz Sanktiounen nom Artikel 61 an 61bis mat sech bréngt.

Eng weider Neierung vun dësem Gesetz betrëfft dann d'Ännerung bei der Berechnung vun den Taxes de rejet. Laut dem Gesetz gëtt d'Taxe de rejet ëm 50% majoréiert, wa keng adequat Reewaasserbehandlung am Mëschsystem ugefaange ginn ass, dëst dräi Joer no Akraafttriede vum Règlement grand-ducal iwwert d'Moosnamepläng. Zweetens gëtt d'Taxe de rejet ëm 100% majoréiert, wa keng adequat biologesch Behandlung vum Ofwaasser agesat gëtt, dëst dräi Joer no Akraafttrieden ebenfalls vun deemselwechte Règlement grand-ducal iwwert d'Moosnamepläng, an drëtters gëtt dann déiselwecht Taxe de rejet ëm annerhallwen Euro majoréiert, wann um Gemengenterritoire méi wéi 33% vun der Schmotzfracht an d'Ëmwelt ofgeleet ginn.

Wat bedeit dat awer elo an der Praxis? Haut hu mer 0,16 Euro pro m³ Taxe de rejet. 50% weinst feelender Reewaasserbehandlung ginn e Surplus vun 0,08 Euro, 100% weinst feelender biologescher Rengegung gëtt e Surplus vun 0,16 Euro pro m³ an dann nach eng Keier déi 1,5 Euro, wann ee méi wéi 33% vun der gesamter Schmotzfracht vun engem Gemengenterritoire direkt an d'Ëmwelt entsuergt. Dat mécht zesummen 1,74 Euro pro m³, déi dann déi Taxe de rejet kann ausmaachen, wat u sech maximal eng Vereeffachung vun där Tax an deem Fall géif duerstellen.

Och wann dës Approche, jo, aus der Optik vum Prinzip vum Pollueur-payeur nozevollzéien ass, esou menge mer, datt dës Mesure net vill Gemengen oder ganz besonnesch déi spezifesch Gemengepappen a -mammen wäert iwwerzeegen, am Ofwaasserberäich op hirem Territoire méi aktiv ze ginn, well u sech de berechente Präis beim Ofwaasser haut schonn 3,5 Euro an zukünfteg, wéi ech et scho gesot hunn, 15 Euro a méi wäert duerstellen. Déi Leit soe sech: „Ma et gëtt jo méi bëlleg, déi 1,74 Euro ze bezuelen, wéi massiv a käschtenintensiv Ofwaasserinfrastrukturen ze bauen, déi à la longue extrem op d'Gemengebudgeten,...“

(**Interruption**)

...op d'Gemengebudgeten drécken.“ Ech wëll och ganz kloer soen, datt ech dat net gutt fannen, mä hei ass just e rechneresch Beispill, fir ze dokumentéieren, zu wat fir engem negativen Effet esou eppes ka féieren.

Mir hätten eis gewënscht...

► **M. Gusty Graas** (DP).- D'CSV ass also éischer derfir, fir d'Waasser verknaschten ze loossen, wéi...

► **M. Aly Kaes** (CSV).- All Froe wann ech gelift...

► **M. Gusty Graas** (DP).- Dat huet een zur Kenntnis geholl.

► **M. Aly Kaes** (CSV).- Uschlëssend u meng Ried duerf een all Froe stellen, mä ech wëll fir d'Éischt meng Zäit notzen, fir meng Ried ze halen. An da kënnen mer roueg eng Froestonn maachen an ech si gäre bereet, op déi eenzel Froen ze äntwerten.

(**Brouhaha**)

► **M. André Bauler** (DP).- Jo, Här Minister!

► **M. Aly Kaes** (CSV).- Mir hätten eis gewënscht, wéi mir et scho gesot hunn, datt een eng positiv Approche gewielt hätt an déi Gemenge belount hätt, déi an der Vergangeneheet grouss Efforten am Beräich vun den Ofwaasserstrukturen getäteg hunn. Eis Proposition, fir déi Entitéit ze belounen, déi et richtig mécht, am plaz déi inaktiv ze bestrofen, ass erëm eng Keier net ugeholl ginn.

Här President, Dir Dammen an Dir Hären, wat d'Subside fir Ofwaasserinfrastrukturen betrëfft, ass vun der Regierung zréckbehalen ginn, datt bei Akraafttriede vum neie Gesetz den Taux vun 90% Subsid op 50% erofgesat gëtt. Dat heescht, datt de maximale Subsidaz just nach 50% ass, mä net nëmme 50%, mä 50% vun engem Forfait. An der Praxis leie mer da bei 30% bis 40% vun de reelle Käschen.

Zousätzlech gëlle folgend Iwwergangsregelen: 90% fir déi Dossierien, déi eng Étude préalable virum 1. Oktober 2010 an e Projet détaillé virum 1. Juli 2015 agereecht hunn; 75% fir déi Dossierien, déi eng Étude préalable virum 20. Oktober 2014 a wou e Projet détaillé och vi-

rum 1. Juli 2015 agereecht ginn ass. An da 65% fir déi Dossierien, déi virun Akraafttrieden vum dësem Gesetzesmodifikatioun agereecht goufen. Déi virgenannten Taux sinn awer nëmmen applikabel, wann dës Projekte 24 Méint no Akraafttriede vum Gesetz ausgeschriwwen sinn. Soss fale mer direkt op 50% Subventioun erof.

Eng weider Konditioun ass déi, datt d'Tarifikatioun vum Waasser nom Waassergesetz an där beträffender Gemeng applizéiert gëtt, dëst op Avis vun der Administration de la gestion de l'eau. D'Verwaltung hält awer keng Decisioun, gëtt just en Avis. An domadder kann och keng Gemeng sech gerichtlich do dergéint wieren.

Här President, mir si géint dës Iwwergangsregeln, well se an der Realitéit einfach net anzehalen sinn. Verschidden Delaie sinn duerch eng limitéiert Zuel vu spezialiséierten Akteure ganz einfach net méi ze kompriméieren. Aus deem Grond gesi mer och den Delai vun der Mise en adjudication des travaux innerhalb vun den éischte 24 Méint nom Akraafttriede vum Gesetz absolutt als irrealistesche.

Duerch dës ondifferenziéiert an onfair Method gi kloer déi Gemenge bestätegt, déi an der Vergangeneheet oder an de vergaangene Joren näischt fir d'Verbesserung vun hiren Ofwaasserinfrastrukturen gemaach hunn. Si verléieren nämlech an der Realitéit näischt. D'Matschafen an der Vergangeneheet gëtt heimadder also ganz kloer net belount.

Duerch déi kuerz Delaie bei der Ausschreiwung vun der Realisatioun entsteet en enormen Drock am Bauséktor, mä ganz speziell an deem Secteur vun deene méi techneschen Infrastrukturen. Par contre ginn et keng Delaie bei den Autorisationsprozeduren vun de staatlechen Verwaltungen. D'CSV-Fraktioun hat an engem Amendement méi laang Iwwergangsregeln proposéiert, déi de Gemengen an de Syndikater genügend Zäit ginn hätten, fir gutt a propper Dossierien an dësem komplizéierte Beräich opzustellen. D'Regierung wollt awer net op dee Wee matgoen.

E weidere Punkt, mat deem mer net averstane sinn, ass dann dee vun der Notion vun der Approbation préalable. Heiduerch ass et engem Bauhär net méiglech, eng Etüd oder eng Aarbecht unzegoen, soulaang hien net d'Approbatioun vum Waasserfong huet. Hei versträicht onnéideg Zäit, a mir waren der Meenung, dass dës Notion ganz einfach an dësem Gesetz gestrach gehéiert, getrei nom Prinzip vun der Simplification administrative.

Leider steet d'Approbation préalable nach ëmmer am Gesetz. Dat heescht am Kloertext, datt als Éischt muss, jo, en Accord vum Minister virleien, ier d'Gemeng mat dem Bau kann ufänken. Hei gouf verpasst, eng Méiglechkeet ze schafen, fir d'Retarden am Ofwaasserberäich méi séier opzeschaffen.

Wat de Volet vun der Simplification administrative betrëfft, esou stelle mer fest, datt bei villen Artikelen zousätzlech Autorisatiounen a Kompensatiounsmoosnamen am Virfeld vu Bauprojekte mussen erfüllt ginn, wat derzou féiert, jo, datt d'Retarden am Waassersektor nach wäerte méi grouss ginn, wéi se scho sinn.

E Beispill ass déi nei Autorisationsfrist vun alle Chantieren, déi mat enger Waassernapp a Kontakt kommen. Dëst sinn awer quasi all d'Chantieren duerch d'Land. Een anert Beispill ass de feelenden Avis zum Règlement-type de canalisation, deen u sech schonns, jo, säit Jore bei der Administration de la gestion de l'eau fir eng Approbatioun läit.

Dee leschte Punkt, deem ech wollt uschwätzen, ass dee vun der Utilité publique. Mir fannen et positiv, datt Mesuren, déi am Beräich vum Ofwaasser musse getäteg ginn, an Zukunft och ënnert de Statut vun der Utilité publique falen, dat haaptsächlech weinst der Problematik vun den Droits de passage an den Terrains-keef.

Domadder kënnen elo all Moosnamen am Beräich vun der Drénkwaasserversuergung, der Renaturierung vun de Waasserleef, de Waasserschutz zonen an elo, wéi gesot, och dem Ofwaasserberäich als Utilité publique deklaréiert ginn.

Mä dat war et awer och schonn! Leider gouf et keng weider Präzisioun, jo, wat de Règlement grand-ducal vum 15. März `79 iwwert d'Utilité publique ugeet. Dëse muss awer eiser Meenung no dréngend adaptéiert ginn an un déi haiteg Besoinen ugepasst ginn.

Och bleift weiderhin de Problem bestoen, datt keng vereinfacht Prozedur virgesinn ass, fir virunzekommen. Am Ausland, wéi zum Beispill an Däitschland, gëtt et eng Prozedur äänlech wéi d'Kommodo-Inkommodo-Prozedur. Déi heescht „Planfeststellungsverfahren“; e richtegt typescht däitscht Wuert. Déi concernéiert Proprietären hunn eng Asprochfrist, no där hir Remarquë vun engem Gremium analyséiert ginn.



Si keng valabel Grënn do, fir en Droit de passage ze refuséieren, kann u sech duerch déi Terrain gefuer ginn.

Eng äänlech Prozedur brauche mer ganz einfach och hei am Land, fir weiderzekommen. D'Utilité publique eleng hëlleft just, fir viru Geriicht unzekommen, mä hëlleft net an der Reduktioun vun der Zäitschinn fir d'Exekutioun.

Här President, Dir Dammen an Dir Hären, schlussfolgernd zéie mer als CSV-Fraktioun folgend Konklusiounen: Mir stelle fest, dass leider nëmme marginal Adaptatiounen um Gesetzesprojet virgeholl goufen. Déi substanzieell Amenderen vum eiser Fraktioun um Niveau Tarifikatioun a Bähëllefe si leider net an dësen Text agefloss. Leider kréien d'Gemengen an d'Syndikater och keen erweidert Matsproocherecht an de Froe vun der Ofwaasserengung.

Et muss ee sech also duerfir och d'Fro stellen, firwat de Gemengesektor an der Vergaangeneheet d'Schold um Retard am Ofwaasserberäich krut. Den Text vun dësem Gesetz weist ganz kloer erëm, dass de Gemengesektor keng Entscheidungs-kompetenzen an dëser Matière huet. Den allgemengen Tenor ass a bleift deen: De Stat decidéiert an de Gemengesektor exekutéiert, bezilt a gëtt responsabiliséiert.

Eiser Meinung no ass d'Gesetz op verschidene Punkte praxisfrem. An et duerf ee sech net wonneren, wa mer mat dësem Text nach esou munch Problemer an Iwwerraschungen an Zukunft wäerte kréien. Jo, ass all deene Grënn verstëtt Der jo, dass mir als CSV-Fraktioun géint dësen Text stëmmen.

Ech soen Iech villmools Merci fir d'Nolauschteren.

► **Plusieurs voix.** - Très bien!

► **Une voix.** - Elo kënn nach d'Froestonn.

► **Une autre voix.** - Maja.

(*Interruption*)

► **M. Aly Kaes (CSV).** - Jo, ganz gär.

► **M. Mars Di Bartolomeo, Président.** - Soll ech bis eraus goen?

(*Hilarité*)

Sou! Ech soen Iech Merci. An déi nächst Riednerin ass d'Madamm Cécile Hemmen fir d'LSAP.

► **Mme Cécile Hemmen (LSAP).** - Här President, Dir Dammen an Dir Hären, als Éischt erlaabt mer, dass ech dem Rapporteur, dem Hér Gérard Anzia, villmools Merci soe fir säin exzellente schréfflechen an och mündleche Rapport. Hien ass schonn am Detail op déi eenzel Bestëmmunge vum Gesetzesprojet agaangen. An dat erlaabt mer dann, just nach eenzel Punkten ervirzehiewen, déi der LSAP ganz besonnesch um Härz leien.

Dëse Gesetzesprojet kënn zu engem Moment an d'Chamber, wou jiddweree ganz daitlech virun Aen huet, wéi existenziell wichteg dass et ass, genuch Waasser a virun allem och an enger gudder Qualitéit ze hunn an dass dat och keng Selbstverständlechkeet ass.

Zu Lëtzebuerg hu mer eigentlech nach ëmmer d'Gefill, an engem Land ze liewen, wou et vill reent, wou ee sech eigentlech iwwer all Dag soll freeën, wou endlech emol gutt Wieder ass a wou et dréchen ass. Mä dat Gefill ass awer net méi esou ganz richtig. Mir brauche just déi lescht Deeg ze kucken. Do hunn d'Wiederkonditiounen bei eis och gewisen, wéi et ka sinn, wa mer lues awer sécher iwwert d'Dréchent e bësse mussen nodenken an och fäerten, wéi eng Repercussiounen dass dat kann hunn.

Mir hunn, iwwert d'Joer gekuckt, net méi zu deeneselwechten Zäite staarken Néierschlag wéi fréier. A mir hu méi oft kuerz unhalenden a ganz staarke Reen, soudass den Iwwerschwemmungsrisiko bei eis och eng Realitéit ass. A grad dëst Joer, wéi ech et gesot hunn, weist, dass mer och scho virum Summer dauerhaft héich Temperature mat eventuell och Waasserknappheet kënnen hunn.

Derbäi kënn awer och, dass ëmmer méi Leit zu Lëtzebuerg wunnen an domadder och de Waasserbedarf an d'Luucht geet, och wann de Pro-Kapp-Verbrauch erofgeet. Déi begrenzte Verfügbarkeet vum Waasser muss dofir och an d'Wuestumsdebatt mat erafléissen, well et eng wichteg Roll spillt. Dat gëllt net nëmme fir de Bevelkerungszouwuess, mä och fir nei Betriber, déi sech bei eis néierloossen. A jee no deem, wat fir eng Aktivitéit mer op Lëtzebuerg unzéien, kann de Waasserbedarf duerchaus och en Thema sinn, dee muss berücksichtegt ginn.

Et ass also méi wichteg wéi jee, dass mer eis un dës Verännerungen upasse mussen an och konsequent Moossnamen ergreife mussen, fir d'Ressource Waasser besser ze schützen an och spuersam dermat ëmzegoen. Dëse Projet de loi liwwert elo e Bäitrag dozou, an d'LSAP ënnerstëtzt dësen Effort.

Wat d'Drénkwaasser ugeet, esou ass den Ausbau vun der SEBES sécher e ganz wichtige Schrëtt, deen eis Kapazitéiten erweidert, mä allerdéngs hu mer och duerno net onbegrenzt Drénkwaasser zur Verfügung. Mir mussen dës Limiten unerkennen an d'Ressource Waasser esou effizient wéi méiglech notzen.

De Waasserschutz huet ganz vill Facetten an et geet net nëmme drëm, genuch Drénkwaasser kënnen bereetstellen. Déi biologesch an och déi chemesch Qualitéit vun de Baachen, de Flëss an de Séien, dat sinn och wichteg Elementer vum Ëmweltschutz. Ganz Ökosystemer hänken dovunner of.

D'Modifikatiounen, déi mer mat dësem Projet de loi wëllen um Waasserschutzgesetz maaichen, betreffen also ganz verschidde Beräicher. Si bréngen deemno um Terrain fir vill verschidden Akteure Verännerungen mat sech. Mat legislative Moossnamen eleng erreeche mer eis Ziler am Beräich vum Waasserschutz awer net. Jiddweree muss säin Deel derzou bäidroen, souwuel den eenzelne Konsument oder awer déi verschidde Wirtschaftssecteure wéi och de Stat an och d'Gemengen.

Dat funktionnéiert och nëmme iwwer en intensiven Dialog op Niveau vun der Opklärungsarbeit, dem Versteesdemech fir d'Bedürfnisser vun deene verschiddenen Akteuren, zum Deel awer och finanziell Kompensatiounen. A wann et wierklech muss sinn, da muss een och op Sanktiounen kënnen zrëckgräifen.

Deen Dialog ze féieren ass d'Aufgab vum Stat a vu sengen Administratiounen. D'Waasserschutzgesetz bitt dofir de Kader. An och e puer Ännerungen, déi mer hei virhuelen, gi schonn eng Äntwert op ganz konkret Problemer, déi festgestallt goufen.

Als Beispill wéilt ech hei d'Afféiere vun engem neie Sektur bei der Tarifikatioun nennen, wou elo besser wéi virdrun der Tatsaach ka Rechnung gedroe ginn, dass et am Horeca-Sektur staark saisonal Schwankunge gëtt, wat de Waasserverbrauch ugeet. Dat heescht allerdéngs net, dass ee Sektur op d'Käschte vun engem aneren eng Faveur gemaach kritt, mä dass d'Berechnung vum Tarif méi genau un déi reell Situatioun ugepasst gëtt.

En anere Volet, dee sech an de leschte Jore staark entwéckelt huet a wou et am Gesetzesprojet eng Rei Modifikatiounen gëtt, ass dee vun de Quellschutzgebiddere. Et ass immens wichteg, dass d'Grundwaasser konsequent geschützt gëtt. Déi betraffe Gebiddere mussen kloer ausgewise ginn an d'Regelen, wat do däréi gemaach ginn a wat net, mussen transparent an och novollzéierbar sinn. Mat dësem Gesetzesprojet an den entspreche Reglementer komme mer an deem Sënn ganz sécher e Stéck weider.

E verbesserte Quellschutz bréngt natierlech och Contrainté mat sech. Besonnesch d'Bauere bekloe sech, dass ëmmer méi e groussen Undeel vun hire Flächen an déi eng oder aner Schutzzon falen a si dës nëmme méi ageschränkt notze kënnen. Dat ass effektiv e Problem, deen eescht geholl muss ginn.

Et ass ganz richtig, dass och d'Landwirtschaft sech muss u verännert Bedéngungen upassen, mä et muss dobäi och unerkannt ginn, dass Bauere bei all deenen Erwaardungen, déi d'Gesellschaft u si stellt, e bësselchen tëschent allequerten de Still setzen. Si solle qualitativ héichwäerteg Liewensmëttel produzéieren, dobäi esou mann wéi méiglech Ressourcé verbrauchen, d'Ëmwelt schounen, den Déierschutz respektéieren, an dat alles natierlech zu engem Präis, dee vum internationale Marché bestëmmt gëtt.

Fräiwëlleg bezuelen d'Konsumenten nëmme zu engem ganz klengen Deel méi fir ëmweltfrëndlech an och déierefrëndlech Produktiounsmethoden. Et sinn d'Subside fir d'Landwirtschaft, déi den Ausgläich schafen tëschent deenen héijen Uspréich an deenen niddrege Präisser vun de Liewensmëttel.

Et ass wichteg, dass de Quellschutz Prioritéit huet, mä d'Bauere mussen fir nei Restriktiounen och e fairen Ausgläich kréien. Si dierfen an der Effentlechkeet net duergestallt ginn, wéi wa si nëmme Schold hätten un eisen Ëmweltproblemer. Ganz am Géigendeel! Et muss unerkannt ginn, dass et grad d'Landwirtschaft ass, déi direkt ënnert de Konsequenze vu verännerte Klimabedéngunge leit an dass si d'Ënnerstëtzung brauch, fir sech och dorunner kënnen unzepassen.

(*Mme Simone Beissel prend la présidence.*)

En anere Partner, deen e ganz wesentlechen Afloss op de Schutz vu Gewässer a vum Drénkwaasser huet, sinn d'Gemengen. Hei besteet eng ganz enk Zesummenarbeit mat de staatleche Verwaltungen, déi och an Zukunft muss ënnerstëtzt ginn an déi néideg Moyene muss zur Verfügung hunn.

D'Gemenge si virun allem an der Responsabilitéit, wann et ëm d'Bauen an och d'Ënnerhale

vun der Waasserinfrastruktur, also den „Wasserleitungen“ geet. Deen anere ganz opwendegen a käschtespillage Volet betrëfft d'Ofwaasserentsuergung. Mir wëssen all, dass et ëm eis Kläranlagen net zum Allerbeschte steet. An et muss ee ganz kloer soen, dass hei d'Gemengen an der Verantwortung stinn. Et gouf leider ganz laang verpasst, aus der Ofwaasserbehandlung eng Prioritéit ze maaichen. An dat huet net um Finanzement gehaangen, well fréier de Stat dës Käschte jo zu 90% iwwerholl huet.

Historesch gesi gouf et hei eng gewësse Suerglosegkeet - nenne mer et emol esou -, déi mer eis haut wierklech net méi kënnen an net méi dierfe leeschten. Wéi d'EU-Kaderrichtlinn, déi um Waasserschutzgesetz baséiert, a Kraaft getrueden ass, hätt eigentlech jiddweree misse virgewarnt ginn, dass et no enger Iwwergangszäit keng Toleranz méi duerfir géif ginn. Mä dat huet eenzel Gemenge leider net beandrockt, mam Resultat, dass Lëtzebuerg wéinst net konforme Kläranlagen - mir wëssen et - veruerteelt gouf a Strofe muss bezuelen.

Den Drock op d'Gemengen ass zanterhier gewuess, an déi finanziell Ënnerstëtzung fir d'Kläranlagen, déi eigentlech net dem Prinzip vum Käschtedeckungsprinzip entsprécht, gëtt graduell zrëckgefouert.

Als LSAP begrëisse mir et, Här President, dass d'Iwwergangszäit vun 12 op 24 Méint eropgesat gouf. Domat gëtt der Tatsaach Rechnung gedroen, dass et net ëmmer un de Gemengen hänkt, wann et net virugeet. Trotz allen Efforten am Beräich vun der Simplification administrative huelen déi néideg Prozeduren oft vill Zäit. An d'Gemengen hunn dorobber nëmme e limitéierten Afloss. Mat der Ausdehnung vum Delai misst awer all Gemeng, déi sech seriö drëm beméit, fir hir Kläranlag op en akzeptabele Stand ze bréngen, eng ganz fair Chance hunn, nach kënnen vun deene méi héije Subsidien ze profitéieren.

Et ass och ze begrëissen, dass hei eng nei Dynamik entstanden ass, soudass mer als Land an e puer Joer awer missten e richtige Qualitätsprong gemaach hunn, wat d'Ofwaasserbehandlung betrëfft.

Käschten entstinn awer net nëmme fir déi Gemengen, déi al Kläranlage moderniséieren, mä och fir Gemenge mat staarkem Bevelkerungszouwuess, déi hir Capacitéite mussen erweidern. Dat muss an Zukunft onbedéngt méi staark berücksichtegt ginn, wa gréisser Logementsprojete geplangt ginn. Engersäits huet d'Gemeng jo d'Méiglechkeet, de Promoteur an engem gewëssene Mooss un de Käschte fir d'Équipements publics ze bedeelegen, anerersäits sollen d'Folgekäschten am Beräich vum Waasser méi staark mat akalkuléiert gi bei staatleche Fördermoossnamen, wéi mer se zum Beispill am Moment nach beim Pacte Logement kennen.

Wa vill gebaut gëtt, dann denkt een natierlech spontan drun, dass mer méi Crèche brauchen, dass mer méi Schoule brauchen, dass mer méi Sportsinfrastrukture brauchen, mä vun de Kläranlage geet awer nëmme ganz seele rieds.

Doriwwer eraus ass et awer wichteg, dass mer no an no bei moderne Kläranlagen och eng véiert Stuf mat virgesinn, wou Medikamenten- oder Pestizidrückstänn kënnen erausgefilit ginn.

Dëse Projet de loi gesäit jo vir, dass déi Subsidien, déi et an Zukunft manner gëtt fir déi biologesch Klärstuf, kënnen fir Pilotprojete genotzt ginn, wou de Stat alt bis zu 100% vun de Käschte kann iwwerhuelen. Dat ass sécher eng gutt Saach a sollt d'Gemengen och motivéieren, fir zu de Virreider an deem Beräich ze gehéieren.

Et soll och eng besser finanziell Ënnerstëtzung gi fir den Héichwaasserschutz, wou nach vill Efforten néideg sinn. Dat Geld ass ganz gutt investéiert, well de Schued, dee bei enger Héichwaasserkatastroph entsteet, ass daitlech méi héich. Ganz ofgesinn natierlech vu mënschlechem Leed, wa Leit hier Haus oder, méi schlëmm esouguer nach, hir Gesondheet verléieren.

Als Konklusioun wéilt ech ënnersträichen, dass de Waasserschutz e ganz wichtige Sujet ass, dee méi an de Vierdergrond réckele muss, wéi dat vläicht an deene vergaangene Jorzenngen de Fall war. Dëse Projet de loi dréit derzou bäi, andeem en e bestoend Kadargesetz verbessert, an huet och natierlech domadder d'Zoustëmmung vu menger Partei.

Ech wéilt awer nach ophale mat enger klenger Weisheet, déi seet: „D'Waasser ass all Quell vum Liewen an elo muss mer et schützen, fir ze iwwerliewen.“ Merci fir d'Nolauschteren!

► **Mme Simone Beissel, Présidente de séance.** - Merci, der Madamm Hemmen. Als nächste Riedner hunn ech den Hér Henri Kox ageschriwwen. Hér Kox, Dir hutt d'Wuert.

► **M. Henri Kox (déi gréng).** - Merci, Madamm Presidentin. Fir d'Éischt wëll ech dann natierlech och mengem Kolleg Rapporteur Merci soe fir dee ganz ausféierleche Bericht. De Gérard Anzia ass op déi gréisst Ännerungen agaangen an huet och Rappeller vun dem urspréngleche Gesetz scho gemaach, wat jo ënner CSV-Majoritéit deemools 2008 och gestëmmt gouf.

Ech wëll och nach eng Kéier dervu profitéieren opzezielen, wat déi Haaptgrënn waren, deemools dat Gesetz an d'Weeër ze leeden: Dat war éischters den Drénkwaasserschutz. Zweitens war et, endlech am Gewässerschutz weiderzekommen; dass mer do ganz grouss Retarden haten, ass scho virdru vu menge Virriedner gesot ginn, et huet u Kläranlage gefeelt. Den drëtter war ganz kloer, an do sti mir als Gréng haut nach ëmmer hannendrun: Dat ass de käschtedeckende Präis um Prinzip vum Pollueur-payeur, wat u sech, mengen ech, awer och nach ëmmer kloer de richtige Prinzip ass.

Da war et och d'Andeelung vun de Secteuren. Mir hu gesot: Okay, mir hunn ënnerschiddlech Bedierfnesser, mir hunn ënnerschiddlech Belaaschtungen, sief et beim Verbrauch wéi och wat de Gewässerschutz ubelaangt, soudass mer och eng Andeelung gemaach hunn deemools vun Industrie, vu Landwirtschaft an ebe vun Haushalter. An och do sti mer, mengen ech, nach ëmmer hannendrun. An da waren natierlech och eng Rei vun anere Punkte wéi Renaturéierung, Héichwaasser an esou weider och schonn erwänt ginn.

An dofir mengen ech, dass dat Gesetz, wat 2008 op de Wee geluecht ginn ass vun eben, wéi virdru gesot, engem Minister aus der CSV, deemools eng richtig Moossnam war, well mer extrem Retarden haten hei am Land. An et ass u sech schonn traureg, dass een dat iwwerhaupt muss an de Mond huelen, dass mir hei am Land weder de Waasserschutz nach den Ofwaasserschutz seriö geholl hunn an deene vergaangene Joren an dass mer dofir eben och souguer eng Strof vu Bréissel kritt hunn, déi och haut nach de Budget belaascht!

Ech denken, dass et héich Zäit gëtt, dass mer éischer iwwert d'Qualitéit vun eise Waasser an Ofwaasser schwätzen, wéi iwwert d'Präisser. Ech denken, ech kommen och méi spët a mengen Ausféierunge ganz kuerz drop zrëck, firwat fir mech de Präis hei wierklech net méi an de Vierdergrond soll gestallt ginn, mä endlech eng seriö Ausenanersetzung iwwert d'Qualitéit souwuel vum Drénk- wéi vum Ofwaasser.

D'Gesetz huet awer missen op de Leescht geholl ginn. Meng Virriedner an de Rapporteur hunn dat ganz kloer gesot: Et waren Defiziter do a mir sinn eben net esou séier weiderkomm, wéi mer dat gehofft haten. Och déi immens héich Subventiounen, déi mer trotzdem nach ëmmer haten, hunn net derzou gefouert, dass effektiv weder Schutzmoossnamen ëmgesat goufen nach dass Kläranlagen an där Schnelllegkeet hu missen entstoen (veuillez lire: dass effektiv Schutzmoossnamen ëmgesat gi wären oder dass Kläranlagen an där Schnelllegkeet entstanen wären, wéi se hätte missen), fir dass dat och weidergeet. Dofir sinn Adaptatiounen duerghefouert ginn an eppes, wat ee vu menge Virriedner virdrun zum Schluss gesot huet, wat ech och ganz staark wëll ënnersträichen, dat ass d'Adaptatioun un de Klimawandel.

Zwee Prinzipien huet de Klimawandel: Éischters, mir mussen en eindämmen. Mir mussen kucken, dass mer de Klimawandel net méi beschleunegen an dofir Moossnamen aféieren. Awer dat Zweet ass gradeso wichteg an ech mengen, déi Erausforderung gëtt vill méi grouss. Hei am Land spiere mer se och, mä an den Entwécklungslänner ass dat nach vill méi dramatesch, dat ass d'Adaptatioun un de Klimawandel.

A wa mer hei Héichwaasserschutz soen, ass dat och eng deels Adaptatioun un de Klimawandel, wann ech och un déi schrecklech Katastroph vum leschte Joer zrëckdenken, wou wierklech e Plazreen erof komm ass. An déiselwecht Situatioun, wëll ech Iech nëmme soen, hate mir virun dräi Wochen zu Réimech, wou mer innerhalb vu 35 Minuten iwwer 35 Liter haten, wou och nach Knéppelstäng derbäi waren, esou zougaangen. An et ass e Gäertner ënnen an eise Dierfchen, deen ënnerhalb vu siwe Minuten 1,50 Meter (veuillez lire: Waasser) a sengem Buttek stoen hat. Dat si Situatiounen, déi mer kengem wëlle wënschen, an dofir ass et wichteg, dass mer alles maaichen, fir déi Adaptatioun esou gutt wéi méiglech an de Grëff ze kréien.



Et sinn eng Rei Adaptatiounen gemaach ginn. Ech wëll déi net all widerhuelen. Ech huelen der e puer. Ech mengen, dass et ganz kloer eng Verbesserung ass, wat den Drénkwaasserschutz ugeet. Dat seet hei jiddwereen. Alleguerten d'Virriedner hunn dat an de Vierdergrond gestallt, dass déi Schutzzonen onbedéngt mussen endlech an Ugrëff geholl ginn an dass do och eng ganz Rei vu positive Moosnamen elo komm sinn, Moosnamen, fir éischstens d'Subventioun an d'Luucht ze setzen, awer och d'Leit net eleng ze loossen. Ech mengen, dat ass wichteg.

Et ass virdru vun der Landwirtschaft geschwat ginn, d'Landwirtschaft hätt immens Oplagen. Et muss een awer soen, dass d'Landwirtschaft haut awer eng ganz Rei vu positive Begleemoosname kritt. An dëst Gesetz mécht jo och eng Ouverture, dass mer endlech och Subventiounen iwwert de Waasserréseau deene kënnen zouguttkomme loossen, déi eppes Effektives maachen. Si hu wirtschaftlech Aboussen an dat soll d'Gesellschaft fir dee gudden Déngscht un der Gesellschaft och honoréieren. An dofir kënne mer dat nëmmen ënnerstëtzen, wann eng Moosnam an déi dote Richtung geet.

Natierlech ass d'Deckelung vun deem Fong (veuillez lire: néideg), well do ass eng Mass vu Suen, déi muss méiglechst gerecht opgedeelt ginn. Dofir geet dann eng Subventioun - an ech komme méi spéit dorop zrëck -, déi vun de Kläranlagen, erof vu 65% op 50%. Och do sti mir als Gréng derhannert.

Ech denken, dass mir 100%eg hei zu deenen Annerungen, oder net ech denken, mä mir stinn 100%eg zu dësen Annerungen, well mir mengen, dass déi virgenannten Defiziter ganz kloer domadder kënne behuewe ginn.

Ech hu virdrun déi véier, fënnf Punkten ugeschwat, ech wëll déi eenzel eng kéier ganz kuerz ofschaffen. Ech kommen dann op d'Drénkwaasser ze schwätzen. Drénkwaasser, ech mengen, dat ass och vum Rapporteur gesot ginn, wann et ee Gutt gëtt, wat mer misste schützen - a meng Virriednerin huet do souguer mat engem flotten Zitat opgehalen -, esou ass et fir mech och eng Selbstverständlechkeet, dass dat niewent der Loft, niewent dem Buedem d'Waasser ass; d'Waasser, fir ze liewen. Ech mengen, dat muss mer ganz kloer ënner Schutz stellen an dofir ass et och wichteg, dat ze maachen.

Mir hunn haut eng Produktioun - dat ass och scho gesot ginn - vun 120.000 m³ am Dag. Obschonn eis Bevëlkerung zouhëlt, esou hëlt awer de Verbrauch pro Kapp of. Et misst een awer elo eng kéier d'Analys maachen, wou dann elo déi Pro-Kapp-Zuelen hierkommen. Ob et an deene Gemengen duerchgezu gëtt, wou e käschendeckende Präis ass, wou en éierleche Präis ass, oder do, wou keen éierleche Präis ass. Et géif mech interesséieren, déi Analys eng kéier ze maachen.

D'SEBES baut jo aus. Mir hunn et ënnerstëtzt, souwuel vum Stat, mir haten e Gesetz hei gestëmmt, net grad näischt, 166 Milliounen Euro investéiere mer an d'SEBES-Anlag, fir méiglechst gutt Waasser kënnen ze produzéieren. Awer och, well mer schonn am Virfeld mussen deels Pestiziden oder aner Partikelen aus dem Drénkwaasser, dem Uewerflächewaasser eraushuelen, well mer kee Schutz virdrun hunn, soudass mer am Nachhinein - dat ass déi „end of pipe“-Mentalitéit - immens mussen investéieren, fir dat ze maachen. Dofir ass et wichteg, dass mer d'Drénkwaasser direkt ënner Schutz huelen.

Et ass jo awer och traureg, dass mer déi lescht Joren hu misse Quellen zoumaachen - Quellen zoumaachen! -, well mer deels Pestiziden, Nitrater an ech weess net wat nach alles fonnt hunn, Metazachlor. Dir kennt déi ganz Diskussioun, déi mer doriwwer haten. Dofir ass et e Schutz, deen onbedéngt éischt Prioritéit muss kréien, an dofir kënne mer dat nëmmen ënnerstëtzen! An dofir sollte mer net de Bauer an den Eck stellen. Mir hëllefen him jo, dat esou gutt wéi méiglech ëmzesetzen.

Et ass ëm déi Drénkwaasserschutzzone gaange virdrun an der Erklärung. Fënnf sinn der ausgewisen, siwe sinn der praktesch duerch a virun enger Woch oder zwou Woche sinn der nach eng kéier dräizéng am Regierungsgrot ugeholl ginn. Ech mengen, dass mer elo dee Retard lues a lues (veuillez lire: opschaffen), wëssend, de Rapporteur hat et gesot, 80 mussen mer der ausweisen, an dat sinn der nach ganz vill. Ech mengen, et ass vun 10% vun der Landfläch geschwat ginn. Mä déi 10% sinn awer net onbedéngt bei de Baueren oder an der Landwirtschaft ze sichen. Et sinn der och ganz vill an de Bëscher respektiv souguer och an de

bebauten Zonen an et ass do, wou de Schutz ganz prioritär muss ugesat ginn.

Et ass gesot ginn: „D'Primme ginn an d'Luucht“, och schonn am PDR. Et muss een och soen, am PDR, dat heescht, am Gesetz vun der Landwirtschaft si scho Moosnamen do, fir dat ze ënnerstëtzen. Ech wëll drun erënneren: Virun 30 Joer ass déi Moosnam schonn a Bayern duerchgefouert ginn, d'Stadtwerke München hu scho virun 30 Joer e Kontrakt mat hirer Landwirtschaft gemaach, fir dat Einzugsgebiet vun hire Quellen esou gutt wéi méiglech ze schützen. An deemools ass dee Projet an d'Liewe geruff ginn, fir déi duerch eng aner Bewirtschaftung, awer och duerch Transfergelder, déi aus dem Drénkwaasser a Richtung vun der Landwirtschaft gaange sinn, ze ënnerstëtzen.

Da kommen ech zu de Kläranlagen. Dat war en zweete Punkt, wou mer - an dat ass och scho virdru gesot ginn - e wahnsinnigen Defizit awer hunn. Ech mengen, et ass awer schonn traureg, dass mer all Dag 2.800 Euro mussen op Bréssel schécken, well mer en Defizit do hunn. An ech wëll do op kee mam Fanger weisen. Ech weisen op meng eege Stiedchen: Mir hunn zwanzeg Joer gebraucht, bis mer e Standuert fonnt hunn, fir eng Kläranlag ze bauen. Ech kucken net op..., neen, mir kucken op eis selwer. Dofir, mir hate laang genuch d'Moyenen, fir déi Kläranlagen ëmzesetzen.

Mir hunn elo endlech eng Kläranlag op der Uewermusel, déi Réimech zesumme mat Schengen a mat Pärel bedreift, also déi vun der anerer Säit. Dat heescht, mir hu probéiert, dee Projet grenziwwerschreidend duerchzeziehen, mä mir hunn awer zwanzeg Joer gebraucht! Mir hunn et net fäerdegbruecht, zu Lëtzebuerg en Terrain ze fannen, dofir si mer op eemol an Däitschland eriwergaangen, fir deen Terrain ze fannen. Dat ass awer en Defizit, deen an der Kompetenz vun de Gemenge louch. Dat war, well keng Gemeng dat deemools wollt iwwerhuelen. Dofir däerf een haut net soen, dass mer elo bestrooft gi vum Stat, dass d'Gemengen net séier genuch gaange sinn.

Mir haten Zäit, ausräichend Zäit, an ech si frou, dass d'Ennermusel zu Maacher - de Kolleeg Buergermeeschter ass de Moment net heibanen -, mä och zu Maacher si mer endlech esou wäit, dass déi Ennermusel, sämtlech aner Gemenge vun der Musel kënnen ugeschloss ginn, soudass mer deen Defizit (veuillez lire: behuewe hunn). Et war ni eng Prioritéit op der Musel, eng Kläranlag ze bauen. Et huet ee jo ëmmer gemengt: „Oh, déi Musel ass grouss genuch, die wird es schon richten.“ Dat gi mer da weider, wëssend, dass déi Däitsch an d'Hollänner müssen aus der Musel respektiv aus dem Rhain hiert Drénkwaasser eraushuelen. Dofir ass dat net verantwortungsvoll vis-à-vis vun deene Länner. Dofir ass et wichteg, dass mer endlech op deem Punkt noginn.

Dass haut déi Subventiounen erfoginn, dat kënne mer ënnerstëtzen, well et ass virdrun erkläert gi vum Här Kaes, dass mer och en Deel scho kënnen ofschreiwen. Dat ass och esou. An deen aneren Deel iwwerhuele mer do vun de Bierger, andeems mer soen, de Pollueur-payeur-Prinzip gëtt ugewannt, net nëmme bei de Bierger, mä bei de Secteuren, bei der Industrie, soudass mer e käschendeckenden an och neutrale Gesiichtspunkt innerhalb vun der Gemeng hunn. An dofir ass et nëmme richtig, dass mer déi Applikatioun hei gemaach hunn.

Et muss een awer och derbäisoen, dass mer awer, an dat war d'Diskussioun an der Kommissioun, déi Iwwergangszäit, an do kann de Vertreider vun der CSV jo awer och zoustëmmen, deen Delai vun 12 Méint op 24 Méint an d'Luucht gesat hunn, fir d'Dossiere fäerdeg ze kréien. En ass virdrun an dem Detail op déi Opschaffung vun deenen Dossieren agaangen. Ech denken, dass déi Grenz vun 12 op 24, also dass mer elo 24 Méint Zäit kréien, fir dat ëmzesetzen, ass genügend. An ech mengen, dass dat endlech och deen néidegen Drock wäert ausüben, dass mer eis Responsabilitéiten op Gemengenniveau iwwerhuelen an dass mer deen Defizit, dee mer wierklech 20, 30 Joer do haten, endlech kënnen opschaffen.

An da wëll ech iwwergoen op dee Secteur, deen elo derbäikomm ass, wou gesot gëtt, jo, dat ass dann d'Recuperéierung op aner Beräicher wéi den Haushalt. An ech hu mer awer d'Méi gemaach, ech hunn d'Statec-Analys geholl an ech hunn de Wuerekuerf eng kéier analyséiert, de Wuerekuerf, wi vill alleguerten hei an der Moyenne, wuel gesot an der Moyenne, ausgi fir eist Drénkwaasser an d'Ofwaasser. An dat gëtt jo gerechent op Promill, et si 718 Punkten, déi de Wuerekuerf beinhalten. A fir d'Waasser an deene ganze 718 Punkte si genau 5,3 Punkten opzeweisen. Fir d'Ofwaasser sinn et 2,2 Punkten.

Ech wëll lech nëmme soen, mir hate vill Diskussiounen hei an der Chamber iwwert de Kaffi, Téi an esou weider. Fir de Kaffi an den Téi, vläicht sinn et déi Kapselen, déi dat esou deier

maachen, do gi mer haut schonn 2,3 Punkten aus an der Tabell vun dem Statec, fir eise Konsum ze decken. Dat heescht, fir de Kaffi gi mer méi aus a mir reegen eis do net op, wat mer do ausginn. Fir d'Drénkwaasser an d'Ofwaasser zesumme sinn et ëmgerechent a Prozenter 1,04%. Ech wëll dat net bewäerten. Ech wëll just nëmme soen de Fakt, d'Tatsaach, dass et wierklech homeopathesch ass fir d'Waasser, en Drénkwaasser oder e Gutt, e Liewensmëttel.

Et ass kee Liewensmëttel, wat esou propper ass, esou oft iwwerpréift a kontrolléiert gëtt vun de staatlechen Instanzen a vun de Gemengen. An all Gemengeappen a -mamme sinn esou responsabel vis-à-vis vum Drénkwaasser, dass se alles (veuillez lire: maachen), Dir wësst, dee Chaos, deen entsteet, dat héiert ee jo iwwert d'Medien, wann emol d'Drénkwaasser huet missen zougemaach ginn an et ass kee Responsabelen an deem Beräich, dee sech wëllt op den Hutt schreiwe loossen, dass en do eppes falsch gemaach huet.

Dofir mengen ech, dass mer dat endlech mussen relativéieren, wat eist Drénkwaasser wäert ass, an dofir mengen ech, dass et e gudde Rappel ass, eng kéier hei haart an däitlech ze soen, wat dat ass.

Sécher seet ee mer: Et ass kloer, et ass eng Moyenne. Jo, mir wëssen och, dass do am sozial schwachen Akommes en Defizit ze sichen ass. Mä do mengen ech awer, an dat hunn ech an den Diskussiounen vun dem viregte Gesetz 2008 nogelies, deemools stoung an de Rapporte ganz kloer, déi sozial Moosnamen, d'sozial Instrumenter sollen esou agesat ginn (veuillez lire: esou agesat ginn, dass dat sech ausgläicht). Et gëtt vun den Allocations de vie chère geschwat. An an all deene Gemengen, wou ech nokontrolléiert hunn, wou ee käschendeckende Waasserpräis ass, sinn och d'Allocations de vie chère vun deene jeeweilege Gemengen esou an d'Luucht gesat ginn, dass et deenen entgéintkënnt, déi et wierklech néideg hunn. An dat ass och dat, wat ganz wichteg ass.

Dat sinn déi Punkten, déi aus eiser Siicht, mengen ech, begrënnen, firwat mir hei zu dësem Gesetz stinn, firwat mir dat hei zu 100% ënnerstëtzen. Ech mengen, dass net alles ëmmer 100%eg ass. Ech mengen, dass d'Richtung (veuillez lire: stëmmt), an dat ass dat Wichtigst, dass mer d'Drénkwaasser insbesondere richtig ënner Schutz huelen iwwert de Waasserschutz. Ech wëll net déi Prozenter nennen, well déi sinn och erschreckend. Wéi ass et? 2% vun eise Uewerflächewaasser sinn an der Rei! Ech mengen, eleng déi Zuel mécht d'Importenz an och d'Urgence vun dësem Gesetz däitlech.

Da kommen ech zum Schluss, an do wëll ech awer och gären op den Héichwaasserschutz kommen. Ech kommen aus enger Stiedchen, déi iwwert d'vergaange Jorzéngten, Jorhonnerten ëmmer geplot war mam Héichwaasserschutz oder mat Héichwaasser. Sécherlech, d'Héichwaasser, esou wéi et soss war, näämlech dass et an deene grouse Flëss eriwuerkomm ass, wäert sech reduzéieren, well et kënnt éischer an deene klenge Baachen, well d'Wieder ganz anescht ass. Wa mir kee Schnéi an de Vogesen hunn an och net dee Reen, deen am Fréijoer war an de Schnéi dann entspreichend zum Schmelze bruecht huet, da kréie mir och keen Héichwaasser.

Dat heescht, mir wäerten dat awer wohlwollend op der Musel, mä net nëmmen op der Musel, opheulen, dass den Héichwaasserschutz, esou wéi dat an Däitschland och de Fall ass, mat 90% subventionéiert gëtt. Awer grad esou wichteg ass d'Renaturéierung. Et ass näämlech dat, wat et wichteg mécht, dass dat Waasser do opgeholl gëtt, wou et sech ausdeene kann, an dass déi Flächen dann och zu 100% ënnerstëtzt ginn an och subventionéiert an dass net nëmmen déi staatlech oder kommunal Institutiounen, mä dass awer och d'Privatleit, déi an deem Fall sinn, kënnen déi Ausweisung maachen an awer och déiselwecht Subventionéierung kréien.

Dofir kann et nëmmen en duebele Jo sinn - de Rapporteur hat schonn eng kéier de Jo gesot - vun der grénger Fraktioun, awer och mäin Onversteesdemech, firwat déi gréissten Oppositionspartei - woubäi et hiert Gesetz ass, dat deemools op de Wee geluecht ginn ass - haut dëst net kann ënnerstëtzen. Et ass e Bedauern, mä trotzdem si mir frou, dass mer hei, déi grouss Majoritéit an déi richtig Richtung geet. An ech soen lech Merci.

► **Plusieurs voix.** - Très bien!

► **Mme Simone Beissel, Présidente de séance.** - Merci dem Här Kox. Als nächsten ageschriwwene Riedner hunn ech den Här Gusty Graas. Här Graas, Dir hutt d'Wuert.

► **M. Gusty Graas (DP).** - Merci, Madamm Presidentin. Effektiv, et ass schonn e puermol

hei de Mëtteg gesot ginn, spéitstens déi klimatesch Verhältnissen aus deene leschte Wochen a Méint hunn erëm eng kéier ganz kloer de Bewäis erbruecht, wéi wäertvoll Waasser ass. Och wann et gëschet an haut e bësse gereent huet - mä dat ass nëmme Gekëddels fir d'Natur -, hu mer awer spéitstens elo gemierkt, wat de feelende Ree vun negative Konsequenzen net nëmme fir d'Landwirtschaft, mä virun allem awer och fir eis Gewässerleef ka mat sech bréngen.

Ech wëll drun erënneren, dass am leschten hydrologesche Wanter zum Beispill nëmmen 251 Millimeter Ree gefall sinn. Dat waren nëmme 55% vun der Moyenne. Am Mee dëst Joer sinn 39,7 Millimeter gefall an do läit u sech normal d'Moyenne bei 77,3. Och an de leschte Wochen, wéi gesot, huet et praktesch guer net gereent.

Et ass just eemol méi ze bedauern, dass esou Situatiounen mussen kommen, fir dass mer eis eemol méi erëm Gedanke maachen, wat dann de Wäert vum Waasser ass, dass mer eis wierklech Froe stellen, wéi mer d'Qualitéit vun eise Gewässerleef verbessere kënnen. Well dat misst u sech eng Konstant sinn. Mir missten eis u sech all Dag d'Fro stellen: „Wéi kënne mer d'Waasser méi respektéieren?“ Mä et ass wéi oft am Liewen, dass, wann et engem gutt geet, ee ganz séier déi Zäiten ignoréiert, wou et engem manner gutt geet.

Mir hunn och hei zu Lëtzebuerg ganz seriö Problemer mat der Qualitéit vun eise Gewässer. Wann een do d'Statistik kuckt, da mussen mer eis net onbedéngt bretzen. Mir hunn u sech keen Iwwerflächegewässer - ech soen dat ganz kloer nach eng kéier hei -, keen Iwwerflächegewässer, wat de Prädikat „ganz gutt“ verdéngt. 23% weisen eng onbefriddend Qualitéit op an 8% hunn esouguer carrement de Prädikat „schlecht“ verdéngt. A wann een dann och de chemeschen Zoustand vun eise Gewässer kuckt, dann ass u sech praktesch kee Gewässer hei vu Lëtzebuerg, wat déi noutwendeg Normen erfüllt.

A wa mer dann och déi berühmte Waasseramerichtlunn eng kéier analyséieren, wou mer jo schonn e puermol, kann ee soen, Rallongé gefrot hunn, da weess een, dass mer bis d'Joer 2027 op Basis vum Artikel 4 eis Gewässer mussen an en anstännegen Zoustand bruecht hunn. Ech wëll net onbedéngt e schlechte Prophéit oder negative Prophéit fir d'Zukunft sinn, mä ech géif elo scho bal all Wett mat agoen, dass mer dat och bis dohinner net wäerte fäerdegbréngen.

Jiddefalls als Fazit kann een direkt soen: Et mussen hei zu Lëtzebuerg nach enorm Efforte gemaach ginn, fir souwuel d'Qualitéit vun eise Gewässerleef wéi awer gegebenenfalls och d'Qualitéit vun eise Drénkwaasser ze verbessere. Duerfir ass et, wéi gesot, och ze begrëissen, dass mer haut eng Upassung vum Gesetz vun 2008 virhuelen, och wann een oder deen anere Punkt natierlech zu méi Diskussiounen wäert Ulass ginn an och vläicht net onbedéngt iwwerall zur gréisster Zefriddenheet wäert geléist ginn.

Eppes ass ganz kloer an deem neie Gesetz: Ee wesentleche Punkt ass eng nei Tarifikatioun. Mir féieren eng nei Kategorie an, eng véiert Kategorie. Dat ass den Horeca-Secteur respektiv d'Campingen. Effektiv, dat ass hei scho gesot ginn, déi hunn natierlech saisonal Schwankungen an dowéinst menge mir och als Demokratesch Partei, dass et richtig ass, fir hei en zousätzleche Secteur virzegesinn.

Wa Waasser fir kommerziell Zwecker genotzt muss ginn, muss een natierlech aner Iwwerleeungen spille loossen. Ech wëll allerdéngs direkt hei ënnersträichen, dass dat awer net onbedéngt e Fräifaartsschäi soll sinn, fir Waasser einfach esou ze benotzen, mä och Waasser muss an deem Beräich ganz kloer mat enger grousser Virsiicht genotzt ginn an et muss virun allem gespuert ginn.

Ech wëll dann awer och nach eng kéier op den Artikel 4 hiweisen, dee méi direkt och d'Landwirtschaft betrëfft. Nun, als President vun der Agrarkommissioun ass een natierlech frou, dass hei versicht gëtt, och am Interêt vun der Landwirtschaft eng Rei Decisiounen zrëckzebehalen, virun allem déi zum Beispill, wa Véi op der Weed ass a se saufen do Waasser aus dem Trach, dat elo aus engem Flosslaf genotzt gëtt, dass dat u sech net méi verrechent gëtt, wat eng positiv Entwécklung ass, wat och kann derzou bäidroen, dass och eenzel Bauere vläicht éischer derzou animéiert ginn, fir hiert Véi net méi d'ganz Joer am Stall stoen ze loossen, mä fir et emol eng kéier op d'Weed eraus ze loossen.

Da si mer natierlech ganz séier bei der Diskussioun vum Waasserpräis. Do gëtt et u sech natierlech tëschent der Regierung an der CSV, ben, fundamental Differenzen. Woubäi ech haut aus dem Mond vun dem CSV-Spreecher net direkt héieren hunn, dass e sech och derfir



agesat huet, fir en eenheetleche Waasserpräis fir d'Menagen duerch d'ganzt Land ze fuerderen. Dat ass eng Fuerderung, déi awer ëmmer erëm hei vun CSV-Sprieher, an ech ginn der-vun aus, en huet jo awer dann och d'Mandat vun der ganzer Partei, gemaach gouf, datt soll am ganze Land en eenheetleche Waasserpräis fir d'Menagen elo festgehalen ginn.

Ech wëll ganz daitlech hei ënnersträichen, datt dat eng Fuerderung ass, déi op daf Ouere bei der Demokratescher Partei fällt. Mir als DP hunn do eng aner Approche. Mir sinn der Meenung, datt een net soll en eenheetleche Waasserpräis hei zu Lëtzebuerg aféieren, virun allem aus dräi Hauptgrënn:

Éischtens emol ass et en direkten Agrëff an d'Tariffautonomie vun de Gemengen. An ech mengen, Dir sidd jo awer och eng Partei, déi sech ëmmer fir d'Autonomie vun de Gemengen setzt.

Dann dierf een awer och net vergiessen, datt d'Käschte fir d'Berechnung vum Waasserpräis awer vu Gemeng zu Gemeng enorm variéieren kënnen, woubäi ech Verständnis hunn, datt natierlech eng kleng Landgemeng, wat eleng de Réseau ubelaangt, vill méi Ausgaben a priori huet. Mä duerfir huet awer eng aner Gemeng op där aner Säit och aner Depensen, déi eng kleng Landgemeng net huet.

An dann ass et virun allem ee Punkt, ee wesentleche Punkt, dat ass deen, wa mer en eenheetleche Waasserpräis hei zu Lëtzebuerg aféieren, da beloune mer an éischter Linn déi Gemengen, déi e bëssen de Luusspätter spillen, déi net gewëllt sinn, grouss Investissementer ze maachen am Interêt,...

(Interruption)

...dach, dach, grouss Investissementer am Interêt vum Waasserschutz ze maachen.

(M. Mars Di Bartolomeo reprend la présidence.)

Dat ass fir eis e wesentleche Punkt, firwat datt mir zum Beispill als Demokratesch Partei géint en Eenheitswaasserpräis sinn. Mir sinn der Meenung, de Prinzip vum Pollueur-payeur soll och um kommunale Plang seng Berechtigung hunn.

Här President, Dir Dammen an Dir Hären, dann ass natierlech och besonnesch den Artikel 5 vun dësem Gesetz ganz interessant. Hei geet et jo natierlech ëm d'Kompetenz vum Waasserschutz. Déi ass laut dem aktuelle Stand natierlech bei de Gemengen ugesidelt. D'Gemenge si responsabel, fir d'Klärung vun den Ofwässer virzehuelen. Et ass duerfir an eisen Aen trotzdem inakzeptabel, datt et awer nach ëmmer déi eng oder déi aner Gemeng duerch d'Land gëtt, déi mengt, dat wier esou e kleng Kavaliersdelikt, wann een net géif déi néideg Efforte maachen, fir d'Ofwaasser anstänneg ze klären.

Ech muss och éierlech soen, ech war awer liicht verwonnert - liicht verwonnert, fir net méi ze soen! -, datt de Vertrieeder vun der CSV, an ech gi jo dervun aus, datt dat och d'Meenung vun der ganzer Partei ass, hei awer reng präislech Iwwerleeungen an de Vierdergrond gesat huet vis-à-vis vun der Qualitéit...

► **Une voix.** - Bravo! Exzellent!

► **Une autre voix.** - Très bien!

► **M. Gusty Graas (DP).** - ...vun eise Gewässer. Bon, d'CSV muss dat da mat sech ofmaachen.

► **M. Aly Kaes (CSV).** - Dat ass net richtig!

► **M. Gusty Graas (DP).** - Ech, wéi gesot, mengen awer nach ëmmer, datt, och wann d'Gemengen d'Responsabilitéit hunn - do-riwwer kann een diskutéieren, ech kommen nach eng Kéier dorobber zrëck -, d'Gemengen hei awer grouss Responsabilitéit hunn an datt net a priori nëmmen de Präis dierf ausschlaggebend sinn, wann et ëm d'Qualitéit vun eise Gewässer geet.

Dowéinst, wéi gesot, datt elo an dësem Gesetz virgesinn ass, datt eng gewësse Penalitéit, Sanktioun vis-à-vis vun eenzelne Gemenge kënn, déi et an engem Zäitraum vun dräi Joer nach ëmmer net fäerdegbréngen, fir hir mechanesch Kläranlagen duerch eng biologesch ze ersetzen, datt déi doduerch mussen eben d'Taxe de rejet 100% verdeiert kréien, fannen ech awer eng ganz valabel, richtig Decisioun. Well et soll een elo net soen: „Am Zäitraum vun dräi Joer kann ech net ëmsuedelen.“ Well dee Problem ass jo awer net eréischt zënter dräi Joer bekannt!

(Brouhaha)

De Problem ass zënter Jorzéngte bekannt. Zënter Jorzéngte bekannt! Hei solle mer elo net eng Gemeng géint déi aner ausspiller. Mä mir wësse jo awer, datt et eenzelner gëtt, déi mengen, et wier méi wichteg, en deieren, schéine Centre culturel ze baue wéi emol eng

anstänneg, effikass Kläranlag. Dat ass eng politesch Decisioun. Mä da brauchen déi Gemengen...

(Brouhaha)

Da brauchen déi Gemenge sech awer och net ze wonneren, wann elo emol eng Kéier de Stat higeet a seet: „Sou, elo geet et duer, elo zéie mer emol e bëssen d'Schrauf zou, an da be-zuelt Der eben elo eng Taxe de rejet, déi méi héich ass!“

Datselwecht gëllt och fir déi Moosnameprogrammer. An déi Moosnameprogrammer...

► **Une voix.** - Vu wat fir engem Programm schwätzt Der do, Här Graas?

► **M. Gusty Graas (DP).** - Déi Moosnameprogrammer sinn och net onbekannt. Déi si schonn zënter Jore vum Stat festgeluecht, an zënter Jore kréien d'Gemengen déi matgedeelt an zënter Jore ginn d'Gemengen en Avis of an zënter Jore wëssen d'Gemengen och, wat op se duerkënn.

(Interruption)

Ech wëll allerdéngs, ech si jo selwer e kleng Kommunalpolitiker. Et ass e bëssen eng Auto-kritik. Woubäi ech awer kann dann...

(Hilarité)

Woubäi ech awer dann dierf soen...

► **Une voix.** - Macht lech net méi kleng, wéi Der sidd!

► **M. Gusty Graas (DP).** - ...- hei sinn der jo zwee, déi mech kontrolléieren -, datt zumindest meng Gemeng op deem Niveau net onbedéngt sënnegt.

(Interruption)

► **M. Mars Di Bartolomeo, Président.** - Här Graas, den Här Kaes wollt eppes soen. Oder hutt Der léiwer, wann en zum Schluss vun Ärer...?

► **Une voix.** - An der Froestonn!

► **M. Gusty Graas (DP).** - Also, ech weess, datt den Här Kaes ëmmer ganz pertinent Fro stellt, duerfir dierf en déi selbstverständlech roueg stellen.

► **M. Aly Kaes (CSV).** - Merci, Här President. Ech wollt u sech just nëmmen den Här Graas froen, ob hien net gutt nogelauschert huet, wéi ech déi Saach erkläert hu vun den 1,74 Euro, wou ech gesot hunn, datt déi Gemenge-pappen a -mammen, déi eben net begeschtert sinn, deen neidegen Invest hei ze maachen, datt déi u sech nach encouragéiert ginn. An datt mer dat net gutt fannen, hunn ech och nach derbäigesot - net gutt fannen! -, wann een do net seng Responsabilitéit als Gemengeverantwortlechen iwwerhëlt.

Et kann ee mer net hei ënnerstellen, ech hätt versicht, déi och nach iergendwéi a Schutz ze huelen. Et geet ganz kloer drëm, datt effektiv déi, déi sech schweierdinn, an där Hisiicht eppes ze maachen, datt déi effektiv och nach encouragéiert ginn, well se maximum eng Charge vun 1,74 Euro pro m³, laut deene Sanktiounen, kënnen kréien iwwert d'Taxe de rejet.

Merci.

► **Une voix.** - Très bien!

► **M. Gusty Graas (DP).** - Här Kaes, Dir hutt mir da wahrscheinlech och elo net richtig nogelauschert, well ech ganz kloer gesot hunn: „Déi Problematik do ass net vun haut an déi ass net vu gësch.“ Och déi Gemenge wousste scho joren-, jorzéngtelaang, datt se enorm Retard hunn, a se hunn sech all déi Joren derlaanscht gedréckt a si hu gemengt, et wier keng Prioritéit, an de Gewässerschutz ze investéieren.

Da brauche se sech net ze wonneren, datt emol den Dag kënn, wou ee seet: „Elo, wann ech gelift, elo musst Der reagéieren, oder Dir musst eng gewësse Penalitéit entrichten!“ Also ech mengen, dat kënnen mer net falsch maachen. Et wier net fair, an ech wëll dat och net maachen, hei eng Gemeng géint déi aner auszespiller. Mä mir wëssen, mir wësse ganz kloer, datt de Gewässerschutz an där enger Gemeng eng Prioritéit huet an an där anerer Gemeng eng manner grouss Prioritéit huet.

Bon, wat eben, wéi gesot, elo de Gesetzes-projet u sech ubelaangt, si mir grosso modo mat deene meeschte Punkten d'accord. Et ass ee Punkt, wou ech herno nach kuerz wäert drop zrëckkommen. Ënner anerem ass jo elo virgesinn, wat eng Evidenz ass, datt et verbueden ass, geféierlech Substanzen an d'Waasser ze rejetéieren. Jo, mir fuerderen allerdéngs, datt do eng gewësse Proportioun respektéiert gëtt, wann et erlaabt ass, déi kleng Remarque hei ze maachen.

Wa mer schonn de Fëscher penaliséieren, well en en halleft Pond Fudder ze vill an d'Waasser geheit, wat zum Deel och net ganz falsch ass, da wëll ech awer op där anerer Säit hunn, datt

och dann déi Betriber, déi Gemengen, déi awer och problemlos eppes an d'Waasser ofloossen, wat net garantéiert ass, datt déi dann och mat darselwechter Verve vläicht an Zukunft wäerten dee Moment sanktionéiert ginn.

Datt mer an Zukunft och verstärkt mussen op alternativ Energie setzen, ass evident. Dat ass en Thema, deen andauernd och hei zur Diskus-sioun steet, zu Recht. Da si mer natierlech och bei dem Waasser. Wéi wäit kënnen mer Waasser notzen, zum Beispill fir Elektresch ze produzéieren? Och do muss een allerdéngs realistesch sinn. Notze vu Waasser, fir zum Beispill Stroum hiezustellen, bréngt och nei ekologesch Problemer mat sech. Wat heescht dat? Dat heescht, en Agrëff an d'Morphologie vun engem Gewässerlaf. Och dat dierf een natierlech net ignoréieren.

Mir wëssen, datt dat zu enger Rei vu Problemer op de Gewässerleef féiert. Dat ka grav Konsequenzen och fir d'Biologie vun engem Gewässerlaf hunn. Dowéinst soll een dat och ëmmer mat enger gewëssener Reserv gesinn. A mir bleiwen nach wie vor der Meenung, Jo zur Notzung vum Waasser, fir alternativ Energie ze produzéieren, awer Neen, wann et gläichzäitig zu enger Zerstéierung vun enger natierlecher Morphologie vun engem Gewässerlaf féiert.

Dat bréngt mech dann natierlech och zu engem wesentlechen Aspekt vun dësem Gesetz, dat ass d'Renaturéierung. An och do muss ee ganz éierlech sinn. Mir hunn - a wann ech soen „mir“, dann ass dat parteiwwergräifend, well et ass ëmmer nach d'Politik, déi responsabel ass -, mir hunn enorm gënneg do an deene leschten, ech soen net an deene leschte Joren, ech soen och net an deene leschte Jorzéngten, mä ech ka roueg soen, an deem leschte Jorhonnert. Do sinn effektiv ganz vill Gewässerleef haart verbaut ginn, déi natierlech Struktur ass zerstéiert ginn. An et gëtt bal keng Gemeng, bal keng Gemeng am Land!, déi net ka soen, datt och op hirem Gebitt nach iergendwéi eng Baach oder e Gewässerlaf haut an enger onnatierlecher Struktur sech presentéiert. Dat dierf, dat kann net méi sinn!

Wat mer näamlech oft ënnerschätzen, dat ass virun allem awer och déi Stärkt vun der Selbstregungskraaft, déi entsteet, wa mer erëm e Gewässerlaf an eng natierlech Morphologie zrëckversetzen. An heiansdo freet ee sech: Firwat hu mer net de Courage, fir dat méi ze maachen? Well mer eben nach ëmmer dat Denken hunn, et muss alles propper sinn, et muss alles riicht gezu sinn. Dat muss der Vergaangenheet ugehéieren.

Duerfir fannen ech et och ganz gutt an dësem Gesetzesprojet, datt elo zum Beispill och Privatpersounen, datt zum Beispill och Gesellschaften, elo eligibel sinn, wa se e Projet eraginn. Da kann, wéi gesot, och eng Renaturéierung op déi Manéier gemaach ginn. Dat wäert och vill Leit dozou incitéieren, fir endlech och méi aktiv op deem Gebitt ze ginn. Ech denken zum Beispill u Besëtzer vu Millen. Wou, an der Zäit, ech verstinn dat och, do war en aneren Zäitgeescht, do sinn Däicher amenagéiert ginn, do si Kanäl amenagéiert ginn. Mä dat huet enorm vill Schued un de Gewässerleef mat sech bruecht. Datt mer déi Leit also haut verstärkt ufänken ze ënnerstëtzen, wa se bereet sinn, och déi Barrieren eng Kéier op-zehiewen, ze zerstéieren. An dat ass e wesentlechen Aspekt och vun dësem Gesetz.

Ech wëll och drun erënneren, datt zum Beispill elo ronn 21 Projeten an der Planung sinn. 5,9 Milliounen gouden an deene leschten dräi Joer do fir d'ekologesch Duerchwanderbarkeet investéiert. Datt sinn iwweregens Informatiounen aus enger Äntwert op eng Question parlementaire, déi ech zesumme mat mengem Fraktionskolleeg Änder Bauler gestallt hat. An et ass och richtig, datt mer op deem Wee weiderginn.

Natierlech befanne mer eis do permanent an engem gewëssene Spannungsfeld tëschent privaten Interessen an och allgemengen Interessen. An da si mer och bei der Duerchwanderbarkeet vun eise Gewässerleef, déi nach enorm vill Defiziter opzeweisen huet. An datt do nach eng Rei Aarbechte musse gemaach ginn, ass net méi wéi normal.

A wat oft vergiess gëtt bei der Renaturéierung, mä dat ass awer och dee positiven Impakt, deen et op d'Iwwerschwemmungsgeforen huet. Dat gëtt jo vill ze vill oft ënnerschat. Wa mer Gewässerleef renaturéieren, huet dat och e positiven Impakt, wéi gesot, op d'Iwwerschwemmungsgeforen. Ech erënneren hei zum Beispill un den lernzdall. Et gëtt elo gläich e Joer, datt do déi extrem Katastroph war. Duerfir ass et och gutt, datt elo déi Iwwerschwemmungskarten do eng legal Basis kréien, datt se och méi respektéiert ginn, bei der Ausweisung vun den neie Lotissementer zum Beispill.

Richtig ass och, datt an Zukunft Bebauungs-zonen oder Zonen, déi an der Zone différée sinn, déi solle reklasséiert ginn, datt déi nëmmen

dierfe reklasséiert ginn zum Beispill fir en nei Lotissement, wann a priori garantéiert ass, datt och déi néideg Waasserinfrastrukture garan-téiert sinn.

An ech wëll elo net nëmmen op d'Waasserversuergung ze schwätze kommen. Ech bleiwen och der Meenung, datt keen, awer och wierklech kee Lotissement méi dierft hei am Land autoriséiert ginn, wann net a priori wierklech garantéiert ass, datt och d'Ofwässer op eng anstänneg Aart a Weis kënnen herno un eng Kläranlag ugeschloss ginn an och deement-sprechend kënnen gekläert ginn.

Dat bréngt mech och dozou, zum Beispill iwwert d'Flosspartnerschaften nach e Wuert ze verléieren. Mir hunn där e puer am Land, déi eng ganz gutt Aarbecht maachen. Ech gesinn dat souguer als komplementar zu der staat-lecher Aarbecht, déi um Niveau vum Environnement, vun der Administration de la gestion de l'eau gemaach gëtt. Do entsteet eng eegen Dynamik. An dat ass och gutt esou. Déi Leit hunn heiansdo vläicht méi Fräiraum.

Datt dat elo nach ausgedeeent gëtt op d'Iwwerschwemmungszonen, dat ass och ganz kloer ze verstoen. Woubäi een och ka soen, et kënnen net déi zwou Partnerschaften an enger zesum-mefléissen. Well, sech fir eng Flosspartnerschaft asetzen, heescht fir mech awer automatesch, sech gläichzäitig och mat dem Volet vun der Iwwerschwemmungsproblematik auserneenze-setzen.

Dann natierlech d'Quelleschutzzonen. Jo, déi sinn hei de Mëtten natierlech och schonn e puermol ugeschwat ginn. Och do, soen ech ganz éierlech, brauche mer eis awer wierklech net ze bretzen. Ech erënneren nach eng Kéier un e Gesetz hei vum 27. Juni vun 1906. Ech war ni gutt an der Mathematik, ech mengen, et sinn 111 Joer hier.

► **M. Gast Gibéryen (ADR).** - Gutt drun erën-nert.

► **M. Gusty Graas (DP).** - Jo. Mir zwee waren derbäi.

(Hilarité)

Also, wann ech awer kucken, wat mer an deenen 111 Joer erreecht hunn, da brauche mer eis awer wierklech keng Medail unzespén-gelen. Mir hu praktesch guer näischt erreecht!

Ech muss awer soen, datt zumindest ënnert dë-ser Regierung eng nei Dynamik entstanen ass.

(Brouhaha)

► **Mme Viviane Loschetter (déi gréng).** - Dat ass perfekt.

► **M. Gusty Graas (DP).** - Dat ass och richtig, datt elo effektiv emol Bewegung an deen Dosier komm ass, datt nei Quelleschutzzonen aus-gewise goufen. An dat ass jiddefalls ee Meritt, dee mer och ze schätze wëssen.

(Brouhaha)

Jiddefalls, déi Quelleschutzzonen, déi gi jo an dräi Kategorien agedelt. Ganz kloer ass, et muss fir déi immediat Quelleschutzzonen an Zukunft eng Nulltoleranz ouni Zweifel gëllen. Well iwwert d'Grondwaasserqualitéit kënnen mer eis jo ganz vill hei ausloossen. An et si Leit heibannen, déi Experte sinn op deem Gebitt. Ech mengen, déi géife mer awer net widder-sprechen, wann ech géif soen, datt eist Grond-waasser hei zu Lëtzebuerg extrem héich Pro-blemer huet.

Dann, wa mer scho beim Drénkwaasser sinn, wéi gesot, si mer och ganz séier beim Stauséi vun Esch/Sauer, iwwert deen och viles ze soe wier. An dësem Gesetz ass jo ënner anerem och virgesinn, datt zum Beispill elo Booter, déi um Stauséi do ronderëmdriewen, ouni datt de Propriétaire sech drëms bekëmmert - do soen ech ganz éierlech: Dat muss der Vergaangenheet ugehéieren! -, datt mer hei ganz kloer Linne festsetzen, wéi dat an Zukunft soll geréiert ginn, dat ass net méi wéi richtig.

Den Artikel 19 vun dësem Gesetz, dee verfeinert dann den Artikel 46 vum besteeënde Ge-setz. Hei geet et jo ëm d'Ausweisung vu Waas-sermassen, déi kënnen genotzt ginn, theoretesch, zum Beispill fir d'Produktioun och vun Drénkwaasser. Mir hunn dee ganz grouse Pri-vileeg hei zu Lëtzebuerg, datt mer jo praktesch kënnen aus dem Volle schëpfen, wéi een esou schéi seet op Lëtzebuergesch.

Mä op där anerer Säit dierf een net ignoréieren, datt vläicht awer an enger noer Zukunft, an d'Experte soen, esou ab 2025, 2030, sech och Problemer kéinte bei der Versuergung vum Drénkwaasser astellen. Datt mer eis dann awer och elo scho mussen eeschthafft Gedanken maachen: Wéi kënnen mer eng Versuergung vun



der Populatioun a vun der Industrie och garan-
téieren? Et gëtt sech Gedanke gemaach: Wéi
kënne mer aner Alternative sichen?

Ënner anerem soen d'Experte jo och, datt ee
gegebenenfalls kéint Drénkwaasser aus der
Musel produzéieren. Deen éischte Moment
gesäit een dat e bëssen als futuristeschen an illu-
soreschen un. Technesch ass dat mat Sécherheet
vläicht méiglech. Mir mussen allerdéngs eis
och bewosst sinn, a mäi Virriedner, den Här
Kox, ass schoonn drop agaangen - d'Musel huet
jo net onbedéngt de Ruff vun engem ganz klo-
ren a proppere Gewässer -, datt do gewëssen
Efforte gemaach gi sinn, mä mir wëssen awer
och, datt d'Musel nach ganz grouss Probleemer
kennt, ënner anerem wat d'Temperatur ube-
laangt, bedéngt och duerch d'Killwaasser vu
Cattenom.

Mä zu dësem Zäitpunkt ass et awer och wich-
teg, datt mer eis Gedanke maachen: Wéi soll
eis Drénkwaasserversuergung an 20, 30 Joer
ausgesinn?

Dann natierlech wëll ech awer zum Schluss
virun allem op dee Punkt ze schwätze kom-
men, deen, net zu Onrecht, soen ech ganz
éierlech, zu villen Diskussiounen gefouert huet
an och nach wäert féieren. De Syvicol huet
sech ganz kritesch do geäussert, anerem hu sech
dozou geäussert. Et geet em, wéi gesot, dee
berüumten Artikel 32 an zwar em déi staatlech
Subventiounen, virun allem beim Bau vu
Kläranlagen, wou jo den Taux elo vu 65% op
50% zrëckgefuert gëtt.

Ech soen et ganz éierlech hei: Och an der DP
ass keng grouss Well vun Euphorie ausgebrach,
wéi mer deen Text do gelies hunn. A mir hunn
eis och eis Gedanke gemaach. A mir bleiwen
och, dat soen ech ganz offen hei, net skep-
tesch, mä trotzdem hoffe mer jiddefalls, datt
eis Befierchtungen sech net wäerten an deem
Sënn ëmsetzen, datt elo vläicht de Contraire
erreecht gëtt vun deem, wat hei gemengt ass.

D'Zréckféiere vu 65% op 50% kann - kann, ech
schwätzen am Conditionnell - derzou féieren,
datt natierlech deen een oder deen anere Syn-
dikate och déi eng oder déi aner Gemeng der
Meenung ass, datt se elo vläicht manner moti-
véiert wier, fir an d'Klärung vun den Ofwässer
ze investéieren. Dat wier ganz schued. Dat wier
ganz schlëmm. Ech hoffen, datt ech mech iren.
Ob et dee richteg Wee ass, muss sech eraus-
stellen.

Mä da si mer awer ganz séier bei der Diskus-
sioun, ob et iwwerhaapt nach opportun ass,
datt eleng d'Gemenge responsabel gemaach gi
fir d'Klärung vun eisen Ofwässer.

Ech ginn lech e ganz einfacht Beispill: Mir hunn
de Floss x, mir hunn d'Gemeng A, déi mécht
maximal Investissementen, fir d'Klärung vun de
Gewässer virzehuelen. Huele mer d'Gemeng B,
déi mécht praktesch guer näischt: Dann hu
mer dem Floss u sech net vill genotzt. Ob et
dann net awer vläicht an der Iwwerleeung rich-
teg ass, fir dann de Stat méi ze responsabiliséie-
ren, mat dem Verbond vun de Gemengen?
Vläicht géif dat och derzou bäidroen, datt nach
méi eng Dynamik an d'Gewässerklärung kéim.
Bis dohinner ass vläicht nach e wäite Re-
flexionsprozess ze maachen.

Jiddefalls, eppes ass kloer: D'Gemengen hunn
awer ëmmer d'Responsabilitéit a sollen och hir
Responsabilitéit deementspreechend iwwerhue-
len.

Et sinn awer natierlech nach eng Rei aner Punk-
ten, déi ganz interessant, ganz wichteg an dë-
sem Gesetz sinn. Zum Beispill, datt och elo bis
zu 100% kënnen Etüden, nei Technologien ën-
nerstëtzt ginn. Ech denken och virun allem un
déi sougenannte véiert Stuf, déi jo virgesinn ass
an déi och muss kommen, wat, wéi gesot,
d'Klärung vun iwwerméissege Medikamente-
rückstänn an den Ofwässer ubelaangt.

Dann och nach e Wuert zu dem Klorecht - dat
ass hei elo de Mëtten nach net ernimmt ginn -,
wat elo iwwerdroe gëtt op auslänneschen Natur-
schutzorganisatiounen. Jo, wann een dat
duerch e reng europäesche Brëll gesäit, da
kann een dat guttheeschen. Ech sinn awer
ganz éierlech: Wann e Lëtzebuurger Bierger elo
vun enger auslännescher Naturschutzorganisa-
tioun vläicht verklot gëtt, wat laut euro-
päeschen Esprit, Dispositiounen legitim ass,
legal ass, kann dat awer vläicht zu gewëssenen
Diskussiounen féieren.

Här President, Dir Dammen an Dir Hären, et
kéint een nach ganz vill iwwert dat Gesetz hei
soen, wat ënner anerem jo och e Finanzéie-
rungsgesetz ass. Et geet hei rieds iwwer ganz
vill Tauxen, et geet hei rieds iwwer ganz vill
Ënnerstëtzen, déi Privatleit, déi Gemengen,
déi Syndikater zouerkannt ginn. Dat ass rich-

teg, soss kéint de Gewässerschutz net op deem
Niveau funktionnéieren.

Ech wëll awer hei ganz kloer och nach betou-
nen: Mir hunn eis vill Gedanke gemaach a mir
maachen eis ëmmer erëm vill Gedanken iwwert
de Waasserpräis. An ech enchainéieren e bës-
sen dat, wat och mäi Virriedner hei vun deene
gréng Kollege gesot huet: Loosse mer eis
awer och emol eng Kéier bewosst sinn, datt
mer déi ganz, ganz grouss Chance hunn, hei
zu Lëtzebuerg am Duerchschnitt 3,5 Euro fir
1.000 Liter - fir 1.000 Liter! - héich qualitativ
Drénkwaasser ze bezuelen! Ech fannen et awer
ëmmer e bësse schued, wann dann - a beson-
nesch d'Gemengeverantwortlech kréien dat jo
als Éischt ze spieren - eng Diskussioun lassge-
trëppelt gëtt, well de Waasserpräis soll em 5,
10, 15% gehéicht ginn. Da mengt ee bal, et
géif eng nei Revolutioun ausbriechen.

Ech mengen, och do solle mer eis bewosst
sinn, wat fir eng Chance datt mer hunn. An
datt de Präis net soll a priori iwwer all Deci-
sioun dominéieren. Wuel wëssend - wuel
wëssend! -, datt et natierlech, selbstverständ-
lech Leit gëtt, déi dat zu Recht aus engem
anere Bléckwénkel gesinn. An do hu mer jo
awer och Mechanismen, fir dann deemtent-
spreechend anzewierken.

Dowéinst, wéi gesot nach eng Kéier, ech hof-
fen, datt an Zukunft de Gewässerschutz, den
Drénkwaasserschutz net marginal wäert behan-
delt ginn, au contraire, nach vill méi eng offen-
siv Politik wäert developpéiert ginn. D'Regie-
rung soll wierklech opgefuerdert ginn, déi néi-
deg Kreditter zur Verfügung ze stellen. An et
soll kee kommen: „Et si keng Sue méi um
Waasserfong.“ Dat däreft et net ginn! Dat däreft
et net ginn, woubäi natierlech d'Geld net däreft
egal wéi no baussen ausgedeelt ginn.

Mä ganz kloer muss et eng Prioritéit sinn, net
nëmme fir dës Regierung, mä och fir déi
zukünfteg Regierungen. Et ass eng grouss
Erausforderung fir eis als Gesellschaft. Mir
mussen zousätzlech gréisser Investissementen
maachen. Et ass an eiser aller Interêt. Wa mer
kee Waasser hunn - ech weess, et kléngt
klischehaft -, dann ass kee Liewe méi.

(Interruption par la présidence)

Ech gi mech elo, Här President.

Merci nach eng Kéier dem Rapporteur Gérard
Anzia fir seng ganz gutt Aarbecht, déi e ge-
leescht huet. An deem Sënn wäert ech selbst-
verständlech och den Accord vun der Demo-
kratescher Partei ginn.

Ech soen lech Merci.

► Plusieurs voix.- Très bien!

► **M. Mars Di Bartolomeo, Président.-** Merci
och. An d'Wuert huet elo den Här Gibéryen.

► **M. Gast Gibéryen (ADR).-** Merci, Här Pre-
sident. Léif Kolleginnen a Kollegen, och dem
Kolleg Gérard Anzia Merci fir säi schrëftlechen
a mündlechen Rapport iwwert dëse Projet, dee
sech mam Drénkwaasser, mam Ofwaasser a
mam Héichwaasserschutz befaasst.

Ech mengen, nodeem elo vill vun eise Kollege
scho méi an d'Detailler agaange sinn, wollt ech
am Fong déi ganz Diskussioun e bëssen an
d'Iwwerleeung, an de Kontext setze vun deem
Eng-Millioun-Äwunnerstat, dee mer ustriewen.
An ech héieren hei, vu menger grénger Säit hei
lénks, schoonn e bësse Gegommels. Woubäi
dës Regierung a virun allem déi gréng Minis-
tere jo awer alles maachen, fir an enger nach ni
gekannter Vitesse wëllen op deen Eng-Millioun-
Äwunnerstat hinzesteieren.

Ech mengen, datt mer am Abléck scho Pro-
blemer hu mat der Waasserversuergung, der
Knappheet. Mir hunn dat alleguer elo festge-
stellt. Wann et eng Woch waarm ass hei zu Lët-
zebuerg, dann hu mer och schoonn hei zu Lët-
zebuerg Problemer mat der Waasserversu-
erung. Och wann de Pro-Kapp-Verbrauch vum
Waasser zrëckgaangen ass, esou ass dach glo-
bal gesinn de Waasserverbrauch an d'Luucht
gaangen.

An duerfir muss ee sech d'Fro stellen: „Wa mer
als Land weider esou wuessen, ekonomesch an
och wat d'Populatioun ubelaangt, wou gi mer
an 10, 20, 30, 40 Joer dat Waasser sichen?“ An
ech wier frou, wann d'Madamm Minister, Här
President, eis dorobber kéint eng Äntwert ginn,
ob d'Regierung sech och Gedanke gemaach
huet, wou mer dat Waasser siche ginn, wa mer
eng Kéier bei enger Millioun Äwunner ukom-
men.

Et ass schoonn de Mëtten hei gesot ginn: Et gëtt
haut scho geschwat vun Experten, datt mer
dann aus der Musel missten Drénkwaasser
maachen. Sécherlech ass dat haut méiglech, fir
esou eppes ze maachen. Mä et muss ee sech
awer d'Fro stellen, ob d'Lëtzebuurger wëllen
esou wuessen, datt herno eng vun de Kon-
sequenzen ass, datt mer d'Waasser vun der
Musel musse propper maachen, fir kënnen ze
drénken, an datt net méi, wéi dat an der Ver-

gaangenheet war, eist natierlech Waasser, wat
propper ass, vun de Quellen, aus dem Stauséi,
duergeet fir ze benotzen.

En Zweet ass d'Ofwaasser, d'Kläranlagen.
D'Kläranlagen, mengen ech, wësse mer alle-
guer, datt mer an deene leschten 20, 30, 40
Joer ëmmer hei an dem Parlament diskutéiert
hunnen, an all Regierung, déi do war, huet e
Maximum gemaach. Dat war wéi den Alex Bo-
dry Ëmweltminister war, de Marco Schank an
alleguer wéi se do waren. An ëmmer hu mer
eis op d'Schëller geklappt, datt mer e Maxi-
mum géife maachen, fir d'Ofwaasser ze klären.
Mam Resultat, datt mer nach ëmmer an där-
selwechter Situatioun sinn an nach ëmmer en
Nachholbedarf hunn, wou mer esou séier net
wäerten nokommen.

An och wa mer esou weider wuessen - och wa
mer esou weider wuessen! -, da wäert dee Pro-
blem och net geléist ginn. Da wäert dee Pro-
blem sech ëmmer erëm stellen, well dann eben
dee Wuesstum, d'Konsequenze vun deem
Wuesstum méi grouss si wéi dat, wat mer am
Abléck amgaange sinn oder fäerdegrëngen,
fir kënnen an déi Richtung ze investéieren.

Datselwecht ass mat den Iwwerschwemmun-
gen. Ech hu mengem Virriedner, dem Kolleg
Gusty Graas, elo ganz gutt nogelauschert,
deen och vun den natierleche Waasserflëss ge-
schwat huet. Mä et ass net nëmme duerch de
Klimawissel, datt mer haut esou Iwwer-
schwemmungen hunn. Selbstverständlech, wa
mer eng Katastroph hunn, wéi mer se am
lernzdall haten, dann ass dat eng Katastroph,
déi mer eben hunn. Mä déi Katastrophen, et
muss ee soen, et ass och net fir d'Éischt, datt
mer esou eng hunn, wéi dat elo am lernzdall
war.

Där hate mer och schoonn an de 50er Joren. Dat
kann ech mech erënneren, datt där och scho
waren. A wa mer hei ënnen an de Gronn ginn
a mer kucken do d'Fassade vun de Maueren,
da stoung d'Waasser scho virun honnert Joer
dräi a véier Meter héich doënnen am Gronn;
op der Echer Plaz stoung et scho meterweis
héich.

Dat heescht, dat ass och keen neie Moment. Et
ass e Moment, dee sech periodesch widder-
hëlt. Woubäi ech awer kloer wëll soen, datt
mer alles musse maache fir de Klimaschutz, fir
dem Klimawandel ze begéinen. Ech wëll dat
also net domadder klengrieden, mä et soll een
awer elo net higoen a maachen, wéi wann dat
doten en neie Phenomeen wär. Deen hu mer
ëmmer kannt.

Da gëtt geschwat vun natierleche Waasserleef.
Wann ech gesinn, wat mer hei an dësem Land
am Abléck amgaange sinn zouzebëtonéieren;
do ass dës Regierung Weltmeeschter dran. De
Combel ass am Fong, datt mer ee Minister
hunnen, dee sech „Nohaltekeetsminister“
nennt. Dat richtegt Wuert wier, wann e géif
Bëtongsminister heeschen, well esou vill, wéi
momentan zouzebëtonéiert gëtt hei am Land, ass
nach ni gemaach ginn!

An, Kolleg Gusty Graas, wa mer kucken,
tëschen Beetebuerg an Diddeleng, do gëtt et
geschwënn nëmme méi Bëtong. Do ass och
eng Kéier eng natierlech Baach gelaf. Mir hunn
heibannen alleguer den Terminal zu Beete-
buerg gestëmmt. Mir hunn en och matge-
stëmmt. Mä wësse mer, wéi vill Hektaren datt
do zouzebëtonéiert ginn, wou d'Waasser herno
sech konzentréiert? An dat ass och ee vun de
grousse Problemer, dee mer hu bei den Iwwer-
schwemmungen, datt doduerch, datt mer in-
tensiv...

Viru 50 Joer hate mer an den Uertschaften
nach deelweis keng Kanalisatiounen, dann ass
d'Waasser an d'Wise gelaf. Dunn hu mer alles
kanaliséiert. Mir hu Collecteure gemaach. An
haut, wann ee Wieder kënnt, dann ass bannent
e puer Minutten dat Waasser konzentréiert an
enger Baach. An dann ass dat normal, datt déi
Baache méi séier Waasser kréien, méi konzen-
tréiert Waasser kréien, an datt dann eben
Iwwerschwemmungen kommen.

A wéi gesot: Mir bëtonéiere maximal zou am
Abléck! Wéi gesot, wann een tëschen Beete-
buerg an Diddeleng kucke geet - ech sinn nach
de Moien derlaanschtgefuer -, wann een dee
ganzen Terminal kuckt, wéi vill Hektaren hu
mer do zouzebëtonéiert! An dat Waasser leeft
dann och net méi konzentréiert an eng Baach,
well déi Baach ass mat zouzebëtonéiert ginn, mä
et leeft a Réier, wou et da weidergeleet gëtt...

(Brouhaha)

Ma sécher, et ass dach e groussen Deel... Et ass
ëmgeluecht ginn. Et ass ëmgeluecht ginn han-
nen.

(Interruption)

Mä et ass och en Deel, deen ënner Réier...

(Interruption par Mme Josée Lorsché)

Et leeft och een, Madamm...

(Interruption)

Et leeft och een Deel duerch Réier bei deem
Site do. Also Dir braucht elo net hei ze maa-
chen, wéi wann dat net esou wier! Et ass
zoubëtonéiert ginn, an dat Waasser kënnt
konzentréiert an déi Baachen zrëck.

► **M. Mars Di Bartolomeo, Président.-** Här
Gibéryen...

► **M. Gast Gibéryen (ADR).-** Här President,
ech hunn nëmme zéng Minutten. Ech hunn
nëmme zéng Minutten!

► **M. Mars Di Bartolomeo, Président.-** Dir
kritt déi selbstverständlech ugerechent!

► **M. Gast Gibéryen (ADR).-** Majo dann.

(Brouhaha)

Da kënnen d'Froe gestallt ginn. Da maache
mer et esou, Här President.

(Brouhaha)

Déi leschte Kéier war et och esou, an herno hat
ech awer keng Zäit!

► **Une voix.-** Traut Der lech net, op eng Fro
ze äntwerten?

► **M. Gast Gibéryen (ADR).-** Ech si gäre be-
reet, wa meng Riedezäit ofgelaf ass, datt Dir
dann...

► **Une voix.-** Ma déi gëtt jo gestoppt.

► **M. Gast Gibéryen (ADR).-** ...mir all déi
Zäit zur Verfügung stellt,...

► **Une voix.-** Déi gëtt jo gestoppt.

► **M. Gast Gibéryen (ADR).-** ...fir datt d'Kol-
leege kënne Froe stellen.

► **Une voix.-** Da behaupt keng Saachen, déi
net wouer sinn!

► **M. Gast Gibéryen (ADR).-** Et ass also...

(Brouhaha)

Kloer. Et ass dee stramme Wuesstum...

► **Une voix.-** Behaupt näischt, wat net wouer
ass!

► **M. Gast Gibéryen (ADR).-** Datt dee
stramme Wuesstum och Konsequenzen huet...

(Brouhaha général)

► **M. Mars Di Bartolomeo, Président.-** Kol-
leegen!

(Brouhaha)

Kolleegen, och den Här Gibéryen. Eng Sekonn,
eng Sekonn! Här Graas, Dir kritt nom Gibéryen
selbstverständlech, nom Här Gibéryen selbst-
verständlech d'Wuert. Wann den Här Gibéryen
léiwer hätt, dass dat duerno gemaach gëtt, da
kritt Dir duerno d'Wuert.

► **M. Gast Gibéryen (ADR).-** Selbstverständ-
lech.

► **M. Mars Di Bartolomeo, Président.-** Här
Gibéryen, Dir hutt d'Wuert.

► **M. Gast Gibéryen (ADR).-** Jo.

► **M. Mars Di Bartolomeo, Président.-** An
entschëllegt fir „de Gibéryen“.

► **M. Gast Gibéryen (ADR).-** Dat mécht
näischt, Här President.

Ech hätt duerfir d'Fro un d'Madamm Minister,
ob se eis kéint soen, wéi d'Regierung aus der
Siicht vun haut d'Waasserversuergung gesäit,
wa mer weider esou wuessen, op eng Millioun
Äwunner hignn, wat do d'Konsequenze wie-
ren, ob dat machbar ass, wou mer dat Waasser
géifen hierhuelen. An och, wat dat am Beräich
vum Ofwaasser als Konsequenzen huet. Dat
géif jo och praktesch bedeiten, datt mer...

(Interruption)

Ech fannen, Här President, datt eis gréng Kol-
leege ferm nervös sinn. Also...

(Brouhaha)

Well mat deem Projet hei ginn natierlech
d'Taxen, ech kommen elo drop ze schwätzen,
méi deier. An do kënnt dat aalt Spréchwuert,
datt Gréng deier gëtt. Dat gëtt hei erëm eng
Kéier...

► **Une voix.-** Ah!

► **M. Gast Gibéryen (ADR).-** Dat gëtt hei
erëm eng Kéier confirméiert. Well wa mer mat
dësem Gesetz, mat dësem Gesetz, wou jo och
d'Gemengen engersäits manner u Subven-
tiounen kréie bei de Kläranlagen...

(Brouhaha)

► **M. Mars Di Bartolomeo, Président.-**
Wann ech gelift! Den Här Gibéryen huet elo
d'Wuert a soss keen!

(Interruption)

► **M. Gast Gibéryen (ADR).-** ...bei de Kläran-
lage manner Subventiounen kréien, gegeben-
falls, wann an engem bestëmmten Delai net
d'Prozeduren ugelaft sinn, och Strofe kënne



kréien, da gëtt hei gesot: „Ma da ginn déi Gemenge gestrooft!“ Neen, d’Gemenge ginn net gestrooft, d’Leit aus deene Gemenge gi gestrooft! Well déi mussen déi Taxe bezuelen!

► **M. Fernand Kartheiser** (ADR).- Très bien!

► **M. Gast Gibéryen** (ADR).- An duerfir muss ee wëssen, datt dat heite bedeit, wa mer dat hei alles duerchzéien, datt d’Leit herno nach méi héich Waasser- an Ofwaassertaxen ze bezuele kréien. An da gëtt hei gesot, dat wier jo awer an deene Gemengen, déi e käschten-deckende Waasserpräis hunn, nogekuckt ginn, do wier jo och d’Allocation de vie chère deen Abléck ugepasst ginn. Mä nach laang net fir all Leit, déi haut Problemer hunn, fir de Gemengen hir Taxen an hir Rechnungen ze bezuelen, an et gëtt der ëmmer méi!

Et si jo genuch Buergermeeschteren heiban-nen, déi kënne jo emol mat hire Receveurs schwätzen, wéi séier datt d’Leit haut hir Rechnungen op der Gemeng bezuelen a wéi séier datt se virun 20 Joer d’Rechnungen op der Gemeng bezuelt hunn. Et ass e gewaltegen Ënnerscheid entstanden, e gewaltegen Ënnerscheid entstanden! D’Leit hunn haut vill méi Problemer, déi héich Rechnungen, déi d’Gemengen ausstellen, ze bezuelen.

An duerfir geet et net méi duer, datt déi Leit, déi ënnert d’Konditiounen vun der Allocation de vie chère falen, datt déi domadder gehollef kréien, mä dat geet haut wäit, wäit doriwwer eraus.

An duerfir proposéiere mir och, datt een net soll nëmmen iwwert de Wee vun der Allocation de vie chère déi Leit kompenséieren, mä datt ee soll e progressiv gestaffelte Waasserpräis afeieren, wou en d’Grondbasis, wat eng Famill, wat eng Persoun brauch, datt een - mir schwätzen do vun 30 Fudder pro Persoun - soll gratis d’Waasser ginn, well dat ass dat, wat all Mënsch brauch.

An duerno soll et natierlech eng Progressioun ginn, fir datt global gesinn de käschten-deckende Präis erauskënnt. A Leit, déi ebe wëlle Waasser verschwenden oder fir Luxusaache Waasser brauchen, mussen ebe méi en héije Präis bezuelen. Well elo muss am Kader vum käschten-deckende Prinzip och dee Klengen hëllefen, d’Vergeudung an d’Verschwendung an de Luxus vum Waasser matzefinanzéieren.

Duerfir, Här President, wann ee kuckt, wat hei geschwat gëtt a wat d’Realitéit ass! D’Realitéit ass, datt dës Regierung weiderfiert, fir de stramme Wuesstum maximal ze maachen, d’Land zoubëtonéiert, mat all sengen negative Konsequenzen. Mam Resultat dann, datt herno deen eenzelne Bierger muss fir déi onverant-wortlech Politik opkommen duerch méi héich Steieren an Taxen.

► **M. Fernand Kartheiser** (ADR).- Très bien!

► **Plusieurs voix**.- Très bien!

► **M. Mars Di Bartolomeo**, *Président*.- Merci. Wann den Här Graas...

► **M. Gast Gibéryen** (ADR).- Här President, ech stinn awer elo, wann Dir wëllt, nach gär fir Froen zur Verfügung.

► **M. Mars Di Bartolomeo**, *Président*.- Ah jo, Dir hutt bäigeliert, Dir hutt lech net gesat. Här Graas, wann ech gelift!

► **M. Gusty Graas** (DP).- Et ass jo net Usus, hei ze kommentéieren iwwert dat, wat ee Riedner gesot huet, soss kéint ee munches hei soen. Dat maachen ech dann eben net. Ech hunn dem Här Gibéryen dann awer zwou Froen ze stellen.

Déi éischt, ob e sech dann awer bewosst ass - Dir hutt elo ugeschwat, zwësche Beetebug an Diddeleng, datt ass eng Géigend, déi mer net ganz onbekannt ass, wéi wann do elo wierklech praktesch alles haart verbaut gi wier -, ass em dann awer bekannt, datt grad do an der Industriezon, wéi den CFL Multimodal amenagéiert ginn ass, datt grad do d’Diddelenger Baach, déi effektiv an engem ganz schlechten Zoustand ass an déi sech do och praktesch duerch Réier muss schlängelen, datt awer do e ganz flotte Projet vu Renaturéierung amenagéiert ginn ass?

An zweetens, ass dem Här Gibéryen dann awer och bekannt, datt eng Gemeng, déi mir och net onbekannt ass, un engem ganz seriöse Projet schafft, fir zum Beispill d’Uelzecht ze renaturéieren, wou se scho ganz vill engagéiert huet, wat derzou soll bäidroen, datt eben déi Gewässer solle méi naturno fléissen, an datt dat och e positiven Impakt op d’Iwwerschwemmungszon huet?

Duerfir géif ech mengen, an Ären Aussoen hei sollt Der lech vläicht e bësse bremsen, well Der hei Saache behaupt, déi der Realitéit net onbedéngt entsprechen.

► **Une voix**.- Très bien!

► **M. Gast Gibéryen** (ADR).- Här President, ech weess net, wéi den Här Graas mer do nogelauschtert huet.

► **M. Gusty Graas** (DP).- Ganz gutt.

► **M. Gast Gibéryen** (ADR).- Ech hu ganz kloer gesot...

► **M. Gusty Graas** (DP).- Ganz gutt hunn ech lech nogelauschtert!

► **M. Gast Gibéryen** (ADR).- Ech hu ganz kloer gesot hei, datt, wa mer weiderfueren, esou zouzebëtonéieren, da kréie mer hannendru Problemer mat dem Waasser, well et da konzentréiert an d’Baach geet. A wa mer tëschent Beetebug an Diddeleng...

(*Interruption par Mme Josée Lorsché*)

Esou vill, ma... Ma Dir hutt d’Camionen op der Strooss!

(*Interruption par Mme Josée Lorsché*)

Also doriwwer... Duerch den Terminal, sidd dach emol éierlech, hu mer méi Camionen op der Strooss, net manner!

► **Mme Josée Lorsché** (*déi gréng*).- Et sinn net esou vill Camionen op der Strooss...

► **M. Gast Gibéryen** (ADR).- Neen. A Frankräich, awer net hei zu Lëtzebug! Hei zu Lëtzebug hu mer se vu Stengefort...

(*Interruption par Mme Josée Lorsché*)

Ma da musst Der awer wëssen, hei zu Lëtzebug hu mer vu Stengefort...

► **Mme Josée Lorsché** (*déi gréng*).- ...Här Gibéryen, awer just net virun Ärer Dier!

► **M. Gast Gibéryen** (ADR).- ...bis op Diddeleng méi Camionen op der Strooss duerch den Terminal. An da luede mer se op den Zuch op. An duerch Frankräich fueren der manner. Awer hei zu Lëtzebug hu mer méi Camionen op der Strooss!

► **Mme Josée Lorsché** (*déi gréng*).- Mir kucken net nëmmen eisen Trottoir.

► **M. Gast Gibéryen** (ADR).- Da sidd dach awer emol ganz éierlech!

(*Interruption et coups de cloche de la présidence*)

Méi Camion vu Stengefort bis op Diddeleng...

► **Mme Josée Lorsché** (*déi gréng*).- Denkt emol global!

► **M. Gusty Graas** (DP).- Dir sidd also dergéint, datt den Zuch soll méi Wueren transportéieren an Zukunft?

► **Mme Josée Lorsché** (*déi gréng*).- Denkt emol méi wäit wéi Är Nues!

► **M. Gast Gibéryen** (ADR).- Wa mer zoubëtonéieren, ass dat, wat ech gesot hunn, richtig. Da kënnt dat Waasser konzentréiert an d’Baachen. A wat mer méi zoubëtonéieren, wat méi grouss Masse konzentréiert an d’Baache kommen. Da kënne mer renaturéieren, mä mir packen dat ni. A mir mierken, datt mat deenen Iwwerschwemmungen d’Waasser konzentréiert kënnt, an dat Waasser räisst och, dat huet d’Erfahrung och matginn, op deene Plazen.

Och bei eis an der Gemeng ass renaturéiert ginn am Kader vun der Autobunn. A wa mer haut kucken, do, wou déi grouss Kanäl erauskommen, do rappt d’Baach, wann eben en déckt Wieder kënnt, erëm alles mat, an dann huet d’Renaturéierung och do erëm net méi am Detail fonctionéiert, esou wéi se geplangt war. Et ass also, Här President, net, wéi verschidde Leit hei an hirer Nervosität mengen, datt ech iergendwéi eppes falsch gesot hätt, mä si sinn nervös, datt se hei eppes anescht erschwätzen, wéi se um lokale Plang decidéieren.

► **M. Gusty Graas** (DP).- Si si guer net nervös, mä si wëllen eppes richtigstellen, well Leit hei Saache behaupten, déi net stëmmen.

(*Brouhaha*)

► **M. Mars Di Bartolomeo**, *Président*.- Sou, an elo huet den Här David Wagner d’Wuert.

(*Interruptions par Mmes Josée Lorsché et Viviane Loschetter*)

► **M. David Wagner** (*déi Lénk*).- Iwwerdreift elo och net!

Merci, Här President.

(*Interruption par Mme Josée Lorsché*)

Merci, Madamm Lorsché. Jo, waart of!

► **Une voix**.- En ass nach e bësse jonk derfir.

► **M. Mars Di Bartolomeo**, *Président*.- Sidd fein mateneen!

(*Interruption par Mme Josée Lorsché*)

Sidd fein mateneen!

► **M. David Wagner** (*déi Lénk*).- Mir sinn ëmmer fein mateneen. Här President,

► **M. Mars Di Bartolomeo**, *Président*.- Soss muss ech lech an de Büro ruffen.

► **M. David Wagner** (*déi Lénk*).- Ech sinn dat gewinnt, Här President, an de Büro geruff ze ginn.

► **M. Mars Di Bartolomeo**, *Président*.- Neen, net Dir.

► **M. David Wagner** (*déi Lénk*).- Ah! Ah sou. Zur Ofwiesslung een aneren.

Här President, mir hunn eis innerhalb vun eiser Sensibilitéit, well mer eng Sensibilitéit sinn...

(*Interruptions*)

Mir hunn net gestridden, mir hu vill doriwwer diskutéiert, iwwert dës Projet de loi, an eis laang d’Fro gestallt, wéi mer eis misste par rapport zu dësem Projet de loi verhalen, well e wichteg ass. En ass awer och ganz vast.

Eng Partie Punkte kann een och an eisen Aen als positiv betruechten, well et kann een éierlecherweis a fairerweis net behaupten, datt dës Projet de loi u sech schlecht wier. Also, déi Punkte sinn och schonn opgezielt ginn, wat d’Verbesserung vun der Definéierung ugeet vun de Schutzzonen, de Bau vu Kläranlagen, vu biologesche Kläranlagen. Och d’Erhéijung vum Subventiounssystem bei Renaturéierung y compris dann och nach, wat elo physisch a moralesch Persounen wäert ugoen. Och d’Ënnerstëtzung, wat Héichwaasser ugeet. Iwwert d’Héichwaasser misst een och nach méi vast diskutéieren. Dat maachen ech nach um Enn vun dëser Interventioun.

Da sollen och d’Infrastrukturearbechte fir den Assainissement an den Approvisionnement genau sou wéi d’Mise en place vun de Zones de protection eng Utilité publique kréien. Dat ass u sech och positiv. Mir mengen awer och, datt mer net laanscht eng Reform vum Gesetz iwwert d’Utilité publique vun 1979 kommen. Dat ass natierlech elo net an dëser Gesetzgebung virgesinn, mä dat géif natierlech och eng ganz Partie aner Problemer, deemno wéi, léisen, ënner anerem och, wat de Logement ugeet oder wat de Kampf géint Baulandspekulation ugeet, andeems een och d’Fro vun der Expropriation kéint reforcéieren.

Aus deenen Ursachen, déi mir och als positiv aschätzen an dësem Projet de loi, wäerte mir och net géint dës Projet de loi stëmmen. Mir gesinn awer och eng Rei Schwierigkeeten, déi eis och net wäerten erlaben, deem Projet de loi eis Zoustëmmung ze ginn.

Do dierft Der och «très bien» soen. Mir hunn...

► **Une voix**.- Très bien!

(*Interruptions et hilarité*)

► **M. David Wagner** (*déi Lénk*).- Ech hunn drop gewaart.

(*Interruption*)

Mir hunn eng Partie Schwierigkeeten domadder, datt, wéi de Fransous géif soen, de Pol ausgedoe gëtt, fir de Pier unzedeoen, well am Géigenzuch och déi Subventiounen, déi den Assainissement betreffen, erfogsat ginn. An an eisen Aen ass dat och e kleng Problem, well d’Gemengen dann awer och dorënner wäerte leiden, wat d’Subventiounen ugeet fir d’Infrastrukturearbechten an den Assainissement.

An da komme mer och bei dee Problem, an dat ass de globale Problem, iwwert deen och hei elo scho geschwat ginn ass an dee sech och an dee ganz Projet de loi abett, et ass eng Modifizéierung vun 2008: Dat ass de Problem vum Käschtendeckungsprinzip, mat deem mir prinzipiell net averstane sinn. A wat jo och erkläert zum groussen Deel, firwat mer och, trotz Verbesserungen, net mat dësem Projet de loi kënnen averstane sinn.

Well mir kommen net derlaanscht ze soen, datt dat op Dauer och derzou féiert, datt d’Gemengen an d’Syndikater hir Präisser eropsetze wäerten. Wéi Dir et vläicht wësst, menge mir, datt dee Käschtendeckungsprinzip weder ëmweltfrëndlech ass nach eng sozial Léisung duerstellt. Dee Prinzip ass vun der vieregter Regierung schonn agefouert ginn a sollt sech an der Logik vum Pollueur-payeur areien. Et ass och nach méi wäit gaangen, well en huet sech och nach agereit an der Logik vum Utilisateur-payeur. A mir mengen awer och net, datt de Pollueur an den Utilisateur kënne gläichgesat ginn.

D’Unhänger vum Käschtendeckungsprinzip behaupten, et géif d’Leit derzou motivéieren, manner Waasser ze verbëtzen, well se dann och dee sougenannten „reelle Präis“ vum Waasser bezuelen. Dat wier dann och an deem Fall eng ëmweltpolitesch Moossnam. Wann een hinnen awer entgéintsetzt, datt méi kleng Revenuen doyunner méi staark beträff sinn, da kritt een als Äntwert, an dat ass jo och schonn hei gesot ginn: „Maja, dofir kënnen och déi finanziell Mannerbemëttelt bei den Office social reesen an eng Allocation de vie chère ufroen.“ Dës Logik kënne mir net zoustëmmen.

Éischstens schonn nëmmen, well et eng Fro vun der Dignitéit ass. Esou eng Approche ass net nëmmen erflossend géintwärt Leit, déi finanziell manner gutt dru sinn - an, et ass scho gesot ginn, där ginn et der ëmmer méi, an dat heescht en plus och net onbedéngt, datt ee wierklech ganz ënnen op der Échelle sociale ass -, si verhënnert och u sech eng global Gerechtegkeetspolitik ze maachen doduerch, datt esou eng Almosepolitik bedriwwen gëtt. Dat ass jo och e Problem, dee mer an der Logementspolitik gesinn.

An d’Unhänger vum Käschtendeckungsprinzip, déi soe jo och gären, an dat ass och schonn hei gesot ginn, an dat hunn ech och ganz oft héieren zanter Joren: „Ëmweltpolitik mécht ee mat Ëmweltmoossnamen, Sozialpolitik mécht ee mat Sozialmoossnamen.“ Dat heescht, all Bërich gehéiert propper vunenee getrennt. An dat ass net richtig. Dat ass eng Haltung, déi engstirnig ass an déi eng global Approche vu soziale Froen verweigert, déi verbonne si mat Ëmweltfroen, mat ökonomesche Froen a mat politesche Froen.

An dat ass grad dat, wat Enn 70er Joren, ufanks 80er Joren eis déi politesch Ekologie bäigeliert huet, déi, am Géigesaz zum grénge Kapitalismus, eis jo beléiert huet, datt een déi Trennung op kee Fall dierft maachen. Wann d’Waasser traitéiert soll ginn, also gebotzt soll ginn, dann huet dat e Käschtepunkt souwuel um Niveau vun den Infrastrukture wéi och, wat de mënschlechen Opwand ugeet. Firwat muss d’Waasser gebotzt ginn? Zum groussen Deel wéinst de Mikropolluante respektiv och Nitraten, déi och zum groussen Deel vun der Industrie produzéiert ginn, sief et déi Landwirtschaftlech wéi déi konventionell Industrie, direkt oder indirekt. Dat dréit natierlech zu der Erhéijung vum Käschtepunkt vum Waasser staark bäi.

E Käschtepunkt, deen d’Gemenge mussen iwwerhuelen an dee sech dann duerno schlussendlech och beim Bierger repercutéiert, dee folglech, duerch de Käschtendeckungsprinzip, d’Pollution, déi duerch d’Industrie direkt oder indirekt produzéiert gëtt, matbezuele muss.

Et gëtt awer eng Léisung, déi souwuel ekologesch ass wéi och gerecht an déi souwuel och mat a Kaf hält, datt d’Waasser engersäits eng Ressource ass, op déi kee Mënsch verzichte kann, an anersäits dat proppert Waasser natierlech e Käschtepunkt huet.

Ech si frou, datt mäi Virriedner elo grad, den Här Gibéryen, eng Mesure vun engem gestaffelte Waasserpräis nomméiert huet. Ech wouss net, datt d’ADR dës Propositionen hätt. Mir verteidege se scho säit Joren, mir mengen tatsächlech, datt de gestaffelte Waasserpräis eng Mesure wier, déi ee weiderhi misst applizéieren an iwwert déi ee misst ganz staark iwwerleeën. Mir hunn och Motiounen an de Gemengeréit dozou als déi Lénk deposéiert; an deene Gemengeréit, wou mer waren.

Et ass scho gesot ginn: dräi Stufen. Eng Stuf, fir wierklech de Waasserverbrauch, deen ee wierklech brauch fir ze kachen, fir déi kierperlech Hygien, datt dee gratis ass, datt dann iwwerhaupt kee muss fir dat Recht op Waasser opkommen, wat jiddwereen, all Mënsch muss hunn, op dat kee Mënsch, keen Déier, souguer keng Planz ka verzichten. Dat elementaart Recht op Waasser, fir iwwerhaupt ze iwwerlieven, datt een dat gratis mécht. Et ass e bësse wéi d’Loft. Et kéint ee sech jo och bal virstellen, deemno wéi, well d’Loft ass jo och polluéiert, datt een och duerno iergendeng Keier misst esou wäit goen - an ech fäerten, datt mer vläicht eng Keier esou wäit kommen -, datt een dat och vläicht nach misst bezuelen.

(*Interruption*)

Indirekt hu mer dat scho bal.

Déi zweet Stuf: Ab 50 Liter, dat ass deen normale Waasserverbrauch, datt deen och zum normale Käschtepräis misst kommen. An ech soen och natierlech dann, datt de Luxuskonsum, fir den Auto all Woch ze botzen an d’Piscine an esou weider, duebel facturéiert gëtt. Dat ass eng ekologesch Mesure, well d’Bewosstsäin, fir net ze verbëtzen, gestärkt gëtt an déi Leit, déi bewosst mam Waasser ëmginn, och nach derfir - tëschent Guillemeten - „belount“ ginn. Anersäits mussen d’Verbëtzer, déi jo meeschtens och méi verdéngen, eendeiteng méi fir de Waasserverbrauch opkommen a ginn op eng gewëssen Aart a Weis dann och derfir bestrooft.

Et soll kee kommen a soen, dës Mesure wier irrealistes, well, ech mengen, souguer mir als déi Lénk sinn net déi Eenzeg, déi dës Meinung verrieden, bäi Wäitem net. A si ass och technesch machbar, quitte datt au cas par cas, vu



Gemeng zu Gemeng, do den néidegen Invest misst néideg sinn.

Schlussendlech wollt ech nach e puer Wuert zur Qualitéit vum Buedem verléieren. Ech mengen, mir wäerten nach weiderhin doriwwer diskutéieren an engem anere Projet de loi, mä Iwwerschwemmungen hu mat der Qualitéit vum Buedem ze dinne. A Westeuropa a wahrscheinlech och nach op anere Plaze vun der Welt, wahrscheinlech och an Nordamerika, mä wahrscheinlech och nach op villen anere Plazen, déi staark industrialiséiert sinn, hu mer jo de Problem, datt duerch déi intensiv an industriell geprägte Landwirtschaft de Buedem souzeseen doutgemaach ginn ass oder net méi esou richteg lieweg ass, wéi e misst sinn.

Et huet mat Pestiziden ze dinne. Et huet och mat engem iwwerdriwwene Plouen ze dinne, wat de Buedem manner léfteg mécht. Et muss ee wëssen, datt net nëmmen d'Beien ausstierwen, mä och d'Wierm ausstierwen. An d'Wierm, déi hu jo eng Funktioun. Ënner anerem besteet hir Funktioun doranner, fir de Buedem méi léfteg ze maachen, wat derzou féiert, datt de Buedem d'Waasser op eng natierlech Aart a Weis kann opfänken, wat ëmmer manner de Fall ass a wat zu engem Deel oder zu engem groussen Deel deemno wéi och zu Iwwerschwemmunge ka féieren.

Ech mengen, mir kommen och net derlaanscht, fir dann eben och iwwert d'Landwirtschaft ze schwätzen, iwwer eng aner Politik, déi ewechkënn vum der industrieller Logik, déi souwuel d'Ëmwelt, de Mënsch, deen och e Konsument ass, wéi och de Bauer selwer op Dauer wäert schiedegen.

Voilà! Wéi scho virdrun ugekënnegt, mir wäerten eis aus deenen Ursaache bei dësem Projet de loi enthalen.

Ech soen Iech Merci.

► **M. Marc Baum** (déi Lénk).- Très bien!

► **M. Mars Di Bartolomeo**, *Président*.- Merci och dem Här Wagner. An d'Wuert huet elo d'Ëmweltministesch, d'Madamm Carole Dieschbourg.

Prise de position du Gouvernement

► **Mme Carole Dieschbourg**, *Ministre de l'Environnement*.- Här President, Dir Damm an Häre Deputéierten, d'Waasser huet haut Prioritéit an dëser Regierung. An ech si frou, dass mer haut dëse Projet de loi hei an der Chamber debattéieren. An ech soen als Alleréisch dem Rapporteur, dem Gérard Anzia, e grouse Merci fir säi vollständige Schrëttchen a mëndleche Rapport. Da wëll ech awer och de Virriedner e grouse Merci soe fir hir Bäiträg zur Diskussioun, well ech mengen, dass mer eis alleguerten eens sinn, dass eist Waasser besser schützen, fir och an Zukunft alle Leit hei zu Lëtzebuerg proppert Drénkwaasser ze garantéieren an eng gutt Liewensqualitéit mat engem intakte Liewensraum, och am Waasser, eng Prioritéit ass. An déi wëlle mer mat dësem Gesetzesprojet och ganz daitlech maachen.

Nach ni gouf hei a Lëtzebuerg esou vill Geld an de Beräich vum Waasser gestach, souwuel - an dat wëll ech nach eng kéier betounen - vu staatlecher Säit, wou mer d'lescht Joer iwwer 80 Milliounen Euro an d'Waasserinfrastruktur gestach hunn, wéi awer och vu Gemengesäit, wou ech eng gewëssen Dynamik gesinn a wou ech gesinn, dass mer gutt ënnerwee sinn, déi enorm Retarden, déi mer haten, opzehuelen. An dëst Gesetz soll eis derbäi hëllefen, den haitege Bedürfnisser Rechnung ze droen an den zukünfte Generatione proppert Waasser ze garantéieren.

Méi präventive Schutz, méi zilorientéiert, mat méi Akteure fir méi a bessere Waasserschutz: Dat waren d'Prämissen, wéi mer un dësem Text geschafft hunn. An ech heimat eng kéier menge Mataarbechter, déi schonn dee ganze Mëtteg nolauschten an déi virun allem dat heite virbereet hunn, e ganz grouse Merci soen.

► **Une voix**.- Aah!

► **Mme Carole Dieschbourg**, *Ministre de l'Environnement*.- De Finanzement ass eropgesat ginn. An domadder kommen ech zum Kästéck vun dësem Gesetz: Dat ass d'Ëmorientéierung vun de Subsiden. Mir hu véier Moossnamen eropgesat, déi mer als immens néideg empfונnt hunn an déi all dem präventive Charakter vum Waasserschutz entsprechen: sief et dem Drénkwaasserschutz, sief et am Héichwaasserschutz, sief et fir méi modern ze ginn, dat heescht d'Frais-d'études, sief et fir d'Renaturationen, de Schutz vum Liewensraum. Dat hu mer alles eropgesat.

Mir hunn nei Subsiden, déi mer aféieren, wa mer regional zesummeschaffen, grad ebe fir dem Klimawandel entgéintzekommen. Mir hunn nei Subsiden, déi mer aféieren, wann et drëm geet, Recherche ze maachen a Pilotprojete mat der Landwirtschaft. D'Landwirtschaft gëtt endlech eligibel. Déi, déi um Terrain schaffen, ginn endlech eligibel. An ech mengen, dat huet jiddwereen hei begréisst. An doriwwer sinn ech perséinlech immens frou, well mer a ville Punkte Konsens hunn.

Mir hunn ee Punkt, do fanne mer heibanne kee Konsens. Dat fannen ech immens traureg, well mer hei mat ganz villen alternative Fakten operéieren. Mir befannen eis an engem Beräich... All déi Beräicher, déi ech elo genannt hunn, do kréien d'Gemeenge kee Geld eran. Wann Dir e Problem hutt duerch Héichwaasser, da kréien d'Gemeenge fir dee Volet kee Geld eran.

An ech mengen, wa mer eis awer am Ofwaasserberäich befannen, dat ass genau dee Beräich, wou mer och vum Käschendeckungsprinzip schwätzen, da si mer hei net nëmmen an engem Beräich, wou mer enorm Retarden hunn, wou d'Fakten eis scho weisen, dass 90% näischt gehollef hunn, dass 75% näischt gehollef hunn. Elo gi mer hei vu 65% op 50% erof, wat wesentlech méi dem Käschendeckungsprinzip gläichkënn a wou Der gesitt, wann Der éierlech sidd a wann Der an eis Nopeschlänner kuckt, wou et déi Subside vum Stat net méi gëtt oder nëmmen nach ganz geréng gëtt, dass mer hei op héijem Niveau kloen. Dat muss mer eis agestoen, wa mer éierlech sinn a wa mer ausserdeem zum Käschendeckungsprinzip stinn.

Da wëll ech awer och nach betounen, an den Här Kaes hat mer gesot: „Ma wa mer dann all eis éischt Anlage gemaach hätten!“ Jo, am Land gëtt et nach am Moment 107 mechanesch Kläranlagen. 107, déi mussen ersat ginn duerch 97 Projeten, vun deenen der 67 Vergrößerunge sinn an de Rescht sinn nei Anlagen.

Soll ech Iech soen, wivill Projeten à ce stade nach net dobanne sinn? Vum Neibau sinn nach genau véier Projeten net dobannen a vum Ausbau 20. Vu 97 Projeten! D'Gemengen hunn - an dat ass e Fakt, an dofir soen ech hinne Merci - an deene leschte Jore massiv Projeten eraginn! An elo rezent - ech mengen, virgëschter oder esou -, de 26./27.06. ass nach e ganze Camion voller Projeten erakomm.

An dat ass déi Dynamik, déi mer brauchen! Domadder erreeche mer eppes! Mir setzen eppes viraus a mir loossen déi Gemengen, déi mat deene 24 Projeten, déi elo nach net erageerecht gi sinn, net am Ree stoen. Neen! Déi Projete kënnen nach bis den 1.1.2018 erageerecht ginn. Also, gitt Iech drun! An dann hu mer jo och nach 24 Méint Zäit, fir dass mer ëmsetzen. Wann dat dann net e gutt Angebot ass, fir op där enger Säit ze soen: „Jo, mir mussen responsabel sinn“, an op där anerer Säit gi mer Iech nach e bëssen Zäit, fir dass mer aus der Inaktioun an d'Aktioun kommen, fir dass d'Leit och an Zukunft hei proppert Waasser hunn. Ma genau dat ass dat, wat mir wollten a wat ech mat dësem Projet hei bezwecken.

Dëse Stat investéiert an deenen nächste Joren ongeféier 1,1 Milliarden an d'Waasser. An dat ass richteg esou! An dat wëlle mer och esou, fir dass mer künfte gutt Waasser hunn!

► **Plusieurs voix**.- Très bien!

► **Mme Carole Dieschbourg**, *Ministre de l'Environnement*.- Komme mer bei d'Drénkwaasserschutzzone. Jorelaang gouf driwwer geschwat. Jorelaang gouf iwwert de Präis geschwat, net iwwert d'Qualitéit. Ech soen dem Henri Kox e grouse Merci, dass en eng kéier d'Relatioun gemaach huet tëschent dem Waasserpräis an deem, wat wierklech wichteg ass, dass mer kënnen och an Zukunft de Krunn opdréien an de Leit hei zu Lëtzebuerg zu engem wierkleche geréngem Präis, wa mer am Wuerekuerf kucken - wat waren et?, 1,04% -, majo, dass mer de Leit nach kënnen, wa se de Krunn opdréien, proppert Waasser ginn. An dofir setze mer eis an!

Siwen nei Schutzzone kommen elo nach dëse Summer. Dann hu mer am Summer 12 Schutzzone, déi do sinn. 13 sinn der nach d'lescht Joer duerch de Regierungsrot gaangen. A verschidde Kollege wëssen et: Mir haten déi éischt öffentlech Veranstaltung och schonn, wou mer ganz vill Leit do haten. An ech mengen, dat ass et: partnerschaftlech e Problem aktiv ugoen. Dat ass am Geescht vun dësem Gesetz; net jorelaang iwwer e Präis debattéieren. Neen, kommt, mir suergen och an Zukunft derfir, dass d'Zonen ausgewise sinn, dass d'Landwirtschaft hiert Geld kritt, déi, déi um Terrain schaffen, hiert Geld kréien! An da kréie mer och d'Drénkwaasser ofgeséchert.

An da ginn ech op dem Här Gibéryen seng Fro an. Mir wëllen net den Eng-Milliounen-Stat, mä mir gesinn, dass e Wuesstum do ass. An dës

Regierung agéiert endlech emol verantwortungsvoll an der Planung. Ech kann Iech och soen: Mir hunn eng Etüd um Lafen, wou mer net nëmme soen, wat geschitt, mä wou mer eis Spuerstrategie ginn, wou mer elo duerch den Drénkwaasserschutz och net müssen, wéi et à ce stade ass, siwe bis zéng Prozent aus der Produktioun huelen.

Am Moment huet Lëtzebuerg fir 50.000 Awunner Waasser aus der Produktioun, well mer net opgepasst hunn, wat aner Akteuren um Terrain maachen. Dat heescht, mir hu misse Waasser aus der Produktioun huelen. Majo, wa mer wëlen och fir d'Zukunft ofsécheren, da mussen mer: éischten schützen, zweetens, eng Spuerstrategie an natierlech och Alternativen oudenken. Mä dat ass Zukunftsmusek. An do si mer amgaangen, eng konkret Etüd och ze maachen, déi ech Iech gären zur gegebener Zäit dann och wäert virstellen.

Dann d'Kläranlagen. Ma natierlech plange mer do vir. Eng Kläranlag, an dat wëssen déi Gemengeresponsabel, déi sech domadder vill beschäftegen, do rechne mir op 25 plus dräi Joer. Et ass also net esou, wéi wann dat ongeplangt wär, mä et muss een awer och d'Saachen ëmsetzen. Et däreif een net nëmmen driwwer diskutéieren. An do si mer frou, dass mer mëttlerweil och mat Projeten an Drénkwaasserschutzgebiddern aktiv sinn, wéi der LAKU, wou awer dëst Joer iwwer 450.000 Euro an d'Uewersauergebitt komm sinn, fir geziilt mat der Landwirtschaft, mam Naturpark a mam Waasserfournisseur Projeten op d'Been ze stellen, fir Alternativen ze ginn, fir Visiounen ze ginn, wat een an engem Drénkwaasserschutzgebitt nach ka maachen.

An ech si frou, dass d'Kommissioun eisem Avis och do nogaangen ass, dass mer net de falsche Message erausschécken, dass mer alles d'utilité publique maachen, well mir wëlle mat der Landwirtschaft an den Drénkwaasserschutzzone schaffen. Dat si ganz wichteg Punkten.

An ech mengen, da komme mer och dorobber, dass mer richtegstellen, wat hei deelweis ebe Falsches och gesot gouf am Beräich vun den Taxen. D'Taxe fir d'Bierger ginn doduerch, dass een ee Punkt erofsetzt, net erop, well de Waasserpräis ass bei 100% vun de Käschten ererechent.

Natierlech müssen d'Gemengen dann dat Geld, wat se erakréie vun hire Bierger iwwert de Waasserpräis, och fir Waasserprojeten asetzen - an dat ass den Challenge -, an net fir aner Projeten. An ech mengen, dat ass awer eppes, wou déi Gemengeresponsabel, déi sech hirer Verantwortung bewusst sinn, matginn a wou déi och wëssen, dass mer e Recht hunn, dass, wann eppes duerch de Waasserpräis erakënn, een dat och a Waasserinfrastrukture kann investéieren.

Bon. Ech soen nach eng kéier alle Virriedner e ganz grouse Merci. Ech denken, dass dëst Gesetz e grouse Schrëtt ass a Richtung Ëmsetzung vun deem, wat sech dës Regierung virgeholl huet, nämlech fir d'Zukunft eng gutt, besser Politik ze maachen.

An dann nach e Wuert zu den Autorisatiounen, well dat gouf jo och nach gefrot. Jo, mir investéieren net nëmme méi, mir maachen net nëmmen ee Reglement no deem aneren an e Gesetzesprojet. Neen, mir hunn och bei den Autorisatiounen Leit bäikritt. Do hu mer haut duebel esou vill Leit dosëtze wéi an de Regierungen virdrun. An dofir si mer och frou. An dofir hoffe mer, dass mer esou schnell wéi méiglech alles, wat mer elo op de Wee bréngen, kënnen deblockéieren.

Ech soen Iech Merci.

► **Plusieurs voix**.- Très bien!

► **M. Mars Di Bartolomeo**, *Président*.- Merci och.

Mir géifen dann zur Ofstëmmung iwwert de Projet de loi 7047 iwwergoen.

Vote sur l'ensemble du projet de loi 7047 et dispense du second vote constitutionnel

An ech fänke mat der Ofstëmmung un. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass elo eriwuer.

(Interruption)

31-mol Jo. Dat gëtt da wahrscheinlech 32, wa mer dem Här Bodry seng derbäischreiwen,...

► **M. Alex Bodry** (LSAP).- Dajee alt.

(Hilarité)

► **M. Mars Di Bartolomeo**, *Président*.- ... well d'Maschinn net geet. 32-mol Jo, 26-mol Neen an 2 Abstentiounen. Domat ass de Projet ugeholl.

Ont voté oui: MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten (par Mme Cécile Hemmen), Mme Claudia Dall'Agnol, MM. Mars Di Bartolomeo,

Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur (par M. André Bauler), M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lamberty, Edy Mertens et Mme Lydie Polfer;

MM. Claude Adam (par Mme Josée Lorsché), Gérard Anzia, Henri Kox, Mmes Josée Lorsché, Viviane Loschetter et M. Roberto Traversini.

Ont voté non: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par Mme Octavie Modert), MM. Aly Kaes, Marc Lies, Mme Martine Mergen (par M. Félix Eischen), M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes, Claude Wiseler, Michel Wolter et Laurent Zeimet;

MM. Gast Gibéryen, Fernand Kartheiser et Roy Reding.

Se sont abstenus: MM. Marc Baum et David Wagner.

Ass d'Chamber bereet, d'Dispens vum zweete verfassungsméissege Votum unzefroen?

(Assentiment)

Jo? Hunn ech Jo héieren? Jo, dann ass dat esou decidéiert.

A mer géifen vun nächste Projet vun eise Ordre du jour iwwergoen, dem Projet 7106, e Protokoll, deen déi europäesch Konventioun iwwert d'Landschaften ofännert. An den Här Anzia ass scho prett, fir de Rapport ze maachen.

5. 7106 - Projet de loi portant approbation du Protocole portant amendement à la Convention européenne sur les paysages, fait à Strasbourg le 15 juin 2016

Rapport de la Commission de l'Environnement

► **M. Gérard Anzia** (déi gréng), *rapporteur*.- Merci, Här President. Ech probéieren, dat ganz schnell ze maachen. Et ass de Projet de loi 7106, wou mer u sech e Protokoll hunn, deen en Amendement mécht zu enger europäescher Konventioun, an zwar der Konventioun vu Florenz, wou et drëm geet, d'Landschaften ze schützen. De Protokoll oder d'Convention de Florence sollt eng Kooperatioun tëschent europäesche Länner, Partner hierstelle wat d'Gestioun, den Amenagement vun de Landschaften ugeet.

An do soll elo eng Erweiterung kommen. Déi Erweiterung ass dee Protokoll, deen hei virläit. Dat ass de Protokoll vu Stroossbuerg vum 15. Juni 2016, wou u sech déi Kooperatioun soll op Länner ausgedéent ginn, déi ausserhalb vun Europa sinn. Dat ass den Haaptpunkt vun dëser Konventioun.

Ganz kuerz: Den Depot war de 17. Januar dëst Joer. De Conseil d'État huet den 9. Mee säin Avis dozou ofginn, d'Chambre de Commerce den 8. Februar, wou jeeweils näischt weider derzou ze soe war. D'Kommissioun war de 17. Mee zesummen. Du sinn ech nominéiert ginn als Rapporteur. An de 14. Juni ass de Rapport ugeholl ginn, dee jo ganz, ganz kuerz ass.

An zwar ware keng Kommentarer vu jeeweils dem Conseil d'État nach der Chambre de Commerce. An et ass een Article unique, wou mer u sech opgefuerdert ginn, dann eben d'Approbatioun zum Protokoll vum Amendement vun der europäescher Konventioun zum Paysage hei ze ginn.

Ech mengen, dat wier dee ganze Rapport. An ech soen Iech Merci fir d'Nolauschten. An ech ginn den Accord vun der grénger Fraktioun.

► **Mme Viviane Loschetter** (déi gréng).- Voilà!

► **M. Mars Di Bartolomeo**, *Président*.- Merci. Kann ech dervun ausgoen, dass déi eenzel ageschriwwen Riedner just den Accord vun der Fraktioun wëlle ginn oder ass nach eppes ze soen?

► **Une voix**.- An dem Rapporteur Merci soen.

► **Mme Viviane Loschetter** (déi gréng).- Genau!

► **M. Mars Di Bartolomeo**, *Président*.- Voilà! Da géif ech dervun ausgoen, dass den Här Marco Schank, den Här Roger Negri, den Här Max Hahn, den Här Kartheiser ebenfalls an den Här David Wagner dem Rapporteur géife felicitéiere fir säin exzellente Rapport an den Accord vun hire Fraktiounen a Sensibilitéite bréngen.

Ass dat esou?